

四庫全書

史部

欽定四庫全書

史部

姑蘇志卷三十三

詳校官編修_臣曹振鏞

檢討_臣德生覆勘

總校官知縣_臣楊懋珩

校對官中書_臣李 葵

謄錄監生_臣陳元熙

欽定四庫全書

姑蘇志卷三十三

明 王鏊 撰

古跡

古今之在天地間猶旦暮也而古人所遺每為今人所重雖故墟阨隴往往過之為躊躇而不忍去豈非以其廢興存亡有足感邪吳自泰伯迄今其間古跡多矣悉記於篇以備後之考者

泰伯城周三里名故吳一名吳城在梅里平墟泰伯既

築此城縱民田其中今屬常州無錫縣寰宇記云泰伯城西去無錫縣四十里平墟高三丈輿地志云吳築城梅里平墟即此地也

太公城章祈城並在長洲縣東北章祈疑即鷓鴣在今二十二都

魚城在吳縣橫山下越來溪西吳王游姑蘇築以養魚續圖經云吳王控越之地本名吳城方言謂魚為吳故誤稱耳今山之傍有岡隱隱如城又有射臺亦在

橫山周益公南歸錄云魚城在田間基厚而方其高

二丈博倍之為田百二十畝土極細故久不壞

元高文度

谷變陵遷自古今耕人指點說魚城綠波已涸無鷗鷺禾黍離離高下生

苦酒城吳地記云在魚城西南故老云吳王築以醞酒

今俗呼為苦酒城

高啓酒城應與酒池通長夜君王在醉中兵入館娃猶未醒越人宜

賞釀夫功

酒醋城吳地記云在胥門西南三里

酒城在壇塘邊一名壇城夫差祭子胥處臨祭勸酒故

名酒城城中有石子祥符圖經云在吳縣東南三十
五里大江邊一名陌城

鴨城在匠門外吳王築以養鴨處東有狶巷畜羖之處
鷄陂在婁門外吳王畜鷄城也又名鷄陂墟其東二里

有荳園亦闔閭置

高啓吳姬不解報朝盈空養鳴鷄
滿別城畢竟餘杭西走日五更誰

唱出
闌聲

柯城赭城鷄陂城衛王城並在吳縣界

舸城在平門外疑即柯城

後城堵城並在長洲縣東南數十里堵城疑卽赭城今尹山鄉有堵城里

伍子胥城麋湖城麗溪城巫櫬城漢志越絕書皆云在吳縣後析置長洲縣

居巢城在長洲縣按楚有居巢城吳亦有之於義無考然史記云闔閭六年楚使子常囊瓦伐吳吳迎擊之大敗楚軍於豫章取楚之居巢而還或疑此時有為而築城未知是否

麋湖西城越宋王城也吳越春秋云平門外有麋王城
麋王與越王遙戰越殺麋王因留葬武里城中故名
以午日死至今武里午日不舉火今吳江有麋城王
廟

搖城在長洲縣東南三十八里吳王子居焉後越搖君
居之今其地名大姚訛之也

越城在胥門外越伐吳吳主在姑蘇越築此城以逼之

城猶髣髴在

高文度古意猶堪弔南湖不憚遙闔閭
開國地勾踐進兵橋城郭高低黍英靈

旦暮潮蒼茫遺獨

立斜日下漁樵

鴻城在婁門外故越王城也

千城在馬安溪上越千王城也

陽城在長洲縣東北其左有陽城湖

相城在長洲縣東北五十里相傳子胥初築城時先於此相地嘗土而城之下濕乃止其地因名

婁城即崑山故城也圖經云在縣東三百步舊志云吳

子壽夢所築

張泰詩高城一望思茫茫湖轉婁江入海長遠市到今無蜀酒古倉何處積吳

糧鷗棲淺渚寒蘆靜雁落平疇晚稻香
野水閒雲吟不盡玉峯西面看斜陽

東城在崑山縣東三百步今橋巷猶以東城為名吳志
云耕者於東寺後多得古城磚及銅箭鏃

武城在崑山縣西北漢書婁縣注云有南武城

金城在崑山縣東三里基址猶存也相傳吳王所築

度城在崑山縣東南七十里相傳為黃巢所築其傍有
度城湖

西鹿城在崑山山下有卜將軍廟碑云葬於崑山西鹿

城

巴城在崑山縣西北十八里其地有巴王墓巴城湖
雉城在崑山縣西北十八里今雉城湖即其地也
顏縣城瓦浦城並在崑山縣皆古經所載

石城在常熟縣北五里吳越春秋云夫差興樂石城吳
地志云越獻西施於吳王王擇虞山北麓以石甃城
為遊樂之所其地今有石城里越絕書云石城在靈
巖山

扈城在常熟縣北五里石城東世傳吳王遊樂石城又
建離宮扈蹕故名扈城今有扈城村

九里城在常熟縣北九里世傳吳王牧馬於此建城以
欄馬俗呼欄馬城有洗馬池今存

莫城在常熟縣南十二里相傳莫邪鑄劍之處一謂劍
城一謂莫邪城今有莫邪大王廟又有莫門塘窰宇
記云漢莫寵築以捍海賊者

朗城在常熟縣東南

鵲城在常熟縣東北十五里

尚墅城在常熟縣北十八里

金鳳城在常熟縣西北四十里

陶城閭城郭城並在常熟縣境

塢城在嘉定縣南五十里吳淞江南舊傳吳王所築其
基尚存

嚳城在嘉定縣南門外唐有嚳城鄉元時築教場於此
得古塚碑石云唐咸通二年莊府君葬於嚳城鄉今

名鰲塘又避吳越王諱改婁塘

吳小城白門闔閭所作秦始皇時守宮吏燭燕窟失火燒宮而門樓尚存

言公井一名聖井在常熟縣治北一百九十步言公宅

傍吳地記云宅有井二傍有洗衣石

高啓寥寥武城宰遺井虞山陰

千載汲未竭九仞功應深藝圃自可灌道源誰復尋絃歌聽已歇瓶綆看還沈無為漂弗食惻惻起歎音一瓢樂未改庶幾回也心

姑蘇臺一名胥臺在姑蘇山舊圖經云在吳縣西北三

十里續圖經云三十五里一名姑蘇一名姑餘史記正義云在吳縣西南三十里橫山西北麓姑蘇山上山水記云闔閭作春夏遊焉又云夫差作臺三年不成積材五年乃成造九曲路高見三百里勾踐欲伐吳於是作柵楣嬰以白壁鏤以黃金狀如龍蛇獻吳王吳王大悅受以起此臺越絕書云闔廬造九曲路以遊姑胥之臺子胥諫不聽又於臺上別立春宵宮為長夜之飲作天池以泛青龍舟舟中盛致妓樂日

與西施為嬉作海靈館館娃閣皆銅溝玉檻飾以珠玉按此則姑蘇臺始於闔閭成於夫差也後越伐吳

吳太子友戰敗遂焚其臺

唐任公叔登姑蘇臺賦司馬遷世掌天官才稱良史

探禹穴之遺跡記吳國之舊軌乃憮然而嘻曰登此姑蘇之墟淹留兮躊躇感斯宇之基為沼而仲雍之祀忽諸我聞周道既衰諸侯狎主中無霸王蠻戎振旅始闔閭以信威繼夫差以極武斜與勁越同壤右以強楚為隣內有高臺之築外有遠略之勤積如莽而暴骨亦如讐而視人是以疆場日駭板築未彌方五載而厥成造中天而特起因累土以臺高宛嶽立而山峙或比象於巫廬之峯或倒影於滄浪之水悉人之力以為美觀厚人之澤以為侈靡斯實累卵於九層夫何見乎三百里野語有之曰川壅則潰月盈

而昃善敗由己吉凶何常矧謀主之賜劒若涉川兮
無梁以為棲越以求霸卒見秦吳而受殃客自南鄙
觀於江濱徘徊舊德惆悵前聞試遊目於寥廓曾是
歸然而參雲聽逆虐而翳諫竟麋鹿而為羣高天放
曠平湖決滌奕奕孤嶼茫茫極浦悲早雁於海風嘯
高鷗於江雨况復關梁坐隔羈旅增愁山木將落汀
葭亂秋思美人兮子胥何為懷直道而驟諫遭重昏
之見危將漁父以抗跡且垂釣於江湄高臺既傾夕
露沾衣感蒞國之不及冀萊人之與歸者也崔鶚姑
蘇臺賦崔子勸學少間與客游於橫山之下有臺歸
然出於羣山荒基峻級高切雲間荆棘為之蒙翳麋
鹿為之徊環余語諸客此何所也客曰子不聞吳都
之壯麗乎造姑蘇之高臺臨四遠而特建此其遺址
也余乃倚杖而立喟然而嘆曰蓋聞吳王之築斯臺
也受隣越之貢竭全吳之力千夫山吟萬人道泣三
年而聚材五年而有立佩茂苑於長洲帶濬池以朝

夕自以為天下之奇觀也而今安在哉神材異木飾
巧窮奇黃金之楹白璧之楫龍蛇刻畫燦燦生輝而
今安在哉於是與客偃俚而上抵其上之絕巔快四
面之遐觀南望洞庭夫椒之山湖水澄澈其名銷夏
灣者吳王避暑之所也北望靈巖館娃之宮廊曰響
屨徑曰採香者吳之別館西子之遺蹤也其東吳城
射臺巍巍其西胥山九曲之達至於興樂有城玩華
有池走犬有塘蓄鷄有陂猶不足以充其欲也又侈
斯臺以為娛嬉嗚呼雕楹鏤檻者邱墟之幾也九層
百仞者汙池之漸也瑤臺作而夏衰瓊室考而商危
章華成而楚衆叛阿房出而秦人離斯喪亂之必然
曷吳王之不思也哉方其酌綠醕賦珍羞置酒若淮
泗積肴如山邱其宴樂固極矣而不知會稽之上飲
食嘗膽方焦思而深謀旁籠西山俯視太湖憑高望
遠三百餘里其登覽固廣矣而不知笠澤之畔銜枚
仆鼓忽潛軍而夜濟是以橫塘之浦僅通而越來之

溪已逼高下之築未乾而勾踐之城已距於咫尺矣
詞未竟客悵然曰已矣乎古往今來邈矣悠哉蒼煙
兮滿目舊事兮飛灰幸江山之不改兮後之人當有
鑑於遺臺李白蘇臺覽古舊苑荒臺楊柳新菱歌高
唱不勝春只今惟有西江月曾照吳王宮裏人曹鄴
吳宮酒未消又宴姑蘇臺美人和淚去半夜閤門開
相對正歌舞笑中間鼓鼙星散九重門血流十二街
一去成萬古臺盡人不回時間野田中拾得黃金釵
李紳越王巧破夫差國來獻黃金重雕刻西施醉舞
花艷傾妬月嬌娥恣妖惑姑蘇百尺曉鋪開樓楣盡
化黃金臺歌清管咽歡未極越師戈甲浮江來伍胥
抉目看吳滅范蠡全身霸西越寂寞千年皆古墟蕭
條兩地皆明月靈巖香徑掩禪扉秋草荒涼徧落暉
江浦迴看鷗鳥沒碧峯斜見鷺鷥飛如今白髮星星
滿卻作閒官不閒散野寺經過懼悔尤公程迫蹙悲
秋館吳鄉越國舊淹留草樹煙霞昔徧遊雲外夢魂

多感歎不惟惆悵到長洲劉禹錫故國荒臺在前臨
震澤波綺羅隨世盡麋鹿占時多築用金鉏力推因
石鼠窠昔年雕輦路唯有採蓮歌許渾宮館遺基輟
棹過黍離無限獨悲歌荒臺麋鹿爭新草空苑鳬鷺
占淺莎吳岫雨來虛檻冷楚江風急遠帆多可憐國
破忠臣死日日東流生白波胡曾吳王恃霸逞雄才
貧向姑蘇醉綠醅不覺錢塘江上月一宵西送越兵
來劉駕勾踐飲膽日吳酒香滿盃笙歌入海雲聲自
姑蘇來西施舞初罷侍兒整金釵衆女不敢妬自比
天下泥越鼓鼙聲騰騰吳天隅塵埃難將甬東地更學
會稽棲霸跡一朝盡草中棠梨開僧皎然古臺不見
秋草哀卻憶吳王全盛時千年月照秋草上吳王在
時幾回望至今月出君不還世人空對姑蘇山山中
精靈安可覩鬼跡人蹤麋鹿聚嬋娟西子傾國容化
作寒陵一堆土陳羽憶昔吳王爭霸日歌謠滿路上
蘇臺三千宮女看花處人靜臺空花自開羅隱讓高

泰伯開基日賢見延陵復命時未為子孫因底事解
崇臺榭為西施楊萬里我亦年來散病身遊人不用
避車塵挿天孤塔雲中出隔水諸峯雪後新道是遠
瞻三百里如何不見六千人吳亡越霸今安在臺下
年年花草春盧錢姑蘇臺下百花洲解語香魂此舊
遊巧笑已傾吳子國淺顰又汚范公舟湖山四顧無
奇骨王伯俱空等拙謀杯酒醉江應自誓男兒西北
有神州潘牂洞僊歌雕簷綺戶倚晴空如畫曾是吳
王舊臺榭自浣紗人去後落日平蕪行雲斷雨幾見
花開花謝淒涼闌干外一簇江山多少圖王共爭霸
莫閒愁金杯澁對酒當歌歡娛地夢中興亡休話漸
倚徧西風晚潮生明月裏鷺鷥背人飛下薩都刺閭
門揚柳自春風水殿幽花泣露紅飛絮年年滿城郭
行人不見館娃宮○野水蒲城飛燕子誰家小艇載
吳姬姑蘇臺上一尊酒落日昏鴉無限悲張羽荒臺
獨上故城西輦路淒涼草木悲廢塚已無金虎卧壞

墻時有夜烏啼采香徑斷來麋鹿響屨廊空變黍離
欲弔伍員何處所淡煙斜日不堪題高啓金樵夜築
西山土催作高臺貯歌舞文身澤國構王基卻笑先
人獨何苦銅溝玉檻盛繁華幻出峯頭一片霞望處
直窮三百里後時應廢幾千家蟠空曲路迷僊仗攀
盡瑤梯纔到上外統雕龍宛轉闌中施繡鳳歲蕤帳
薰爐長藝鬱金香共道千齡樂未央茂苑月來秋珮
冷洞庭雨過夏綃涼當窓衆妓如僊女揚袂迎風欲
輕舉人從天上見經過鳥向雲間驚笑語日暮橫塘
花盡開捲簾臺上望玉來宴舟初自觀漁返獵騎還
從射鹿迴從登不用持鉞隊自列紅粧侍高會香傳
羅帕進黃柑縷切鸞刀供玉鱠燭光遠落太湖波驚
起魚龍出沒多城上烏啼河漢轉此時誰問夜如何
管絃嘈嘈聒人耳不聞兵來渡溪水欲攜西子走登
舟醉倚畫欄嬌不起瞑目無因到甬東可憐一炬綺
羅空獻媚竟墮讐人計賜劒應辜諫士忠客來試問

遺宮路物色荒涼總非故牽衣始信不虛言滿地荆
榛見零露當年爭奪苦勞機卻把江山付落暉聞說
越王臺殿上如今亦有鷓鴣飛沈周姑胥遺事有荒
臺今日登臨尚可哀千載芑桑天子棄六宮芳草美
人栽南飛鴻雁秋風早西向山川夕照
開流水梧桐幾番夢獨憐公聖不重來

郊臺在橫山東麓石湖之上相傳吳僭王號時嘗郊祭

於此今壇壝之形尚存

虞堪吳王城外拜郊臺山色湖光共繞迴終古翠華隨水

去何年玉牒為天開斜陽一笛牛羊下細雨千帆雲鳥來忠死倭存隨霸業登臨不盡客興哀

館娃宮吳越春秋吳地記皆云閭闔城西有山號硯石
在吳縣西三十里上有館娃宮今靈巖寺即其地也

王阮賦汎浮玉之北堂得館娃之遺基從先生而遊焉揖夫差而弔之或曰是可唾也奚以弔為哉夫沈湎以喪國固君人之失道然而有鐘鼓者胡可以弗考聞管籥者民喜而相告苟厥妃之當愛惟恐王之不好矣是則女樂亦可少乎必曰夏有末喜商有妲己周有褒姒而吳以西子苟求其故未必專於此也齊有六嬖桓公以興正而不譎聖人稱焉非夫九合一匡之業得仲父以當其任則其一己之內少有以自適者舉不足以害成邪關大夫進夏德豈昏微子得政商豈穢間蘇公家父並用則烽火豈得妄舉子胥不見戮則吳之離宮別館至於今可存抑夫差之資異在列國亦翹楚一戰而越沮再會而諸侯懼使僅得一中佐置雙翼於猛虎惟自剖其骨鯁而放意於一女敵乘其間無以外禦杯酒之失何足問獨為此邦惜殺士之舉也此士不遭殺夫差不可愚苧羅之妹適足為我娛胡得而竊吾之符榮楯可居適足

華吾廬胡足以隳吾之都惟忠良之既誅始猖狂而
自如臺兮姑蘇舟兮太湖食兮鱸曲兮棲烏宿兮
嬪嬙修明兮夷光二八兮分明捧心兮專房徑兮採
香屨兮響廊笑倚兮玉床奈樂兮東方稻蟹種兮不
遺爭盟兮黃池無人兮箴規有仇兮相窺至德之廟
遂為禾黍悉陂池與臺榭倏一變而梵宇入笙歌於
海雲令聲鐘而轉鼓儼麋鹿之容與瞰僧儀而觀觀
駭越壘以在望奚五戎之閒武松引韻以鳴咽柳顰
眉而凝佇山黯黯兮失色水洶洶兮暴怒追此謬於
千里本差之於毫釐譬之養生捐其良醫逮疾作於
中夜憎藥石之不知志士仁人所為太息於斯焉蓋
嘗反覆于此竊謂種蠱亦可哂也勾踐方明舉國以
聽十年生聚十年教訓以此衆戰何伐不定何至假
負薪之女為是可恥之勝哉始其土城誨淫自君終
焉五湖合歡其臣青溪之典不正金谷之義不立悠
悠扁舟遂其全璧使之脫鼎中之魚而羣沙頭之鷺

返邪溪之蓮而吐洞庭之橘竊謂越之君臣何其陋
於此役也越則陋矣吳亦太庸士目既狹夫誰納忠
可辜人之亡已其自反而責躬乎公既然雍相與歛
容起視四山之中覺蕭蕭兮悲風范成大賦淘西山
之南奔勢鬱律其峴空若大敵之在前忽踞虎而踞
龍半紫崖而砥平訪館娃之故宮是為逸王之舊遊
有墟谷之遺恫焉嗟乎悲哉懷賢胥之忠告巽陰詔
之說說闇養虎之後患縱處女使兔脫迨嘗膽之謀
成駭疽囊之潰裂蓋自有以賈禍非天為之孽方其
銜哀茹痛收淚飲血儼拂士於前庭尅三年而報粵
訖甘心之一快夫何初志之英發及其見棲於姑蘇
遽雌伏而大壞援宿恩而乞憐或赦圖於臣罪當是
之時又何其憊也悼禍福之無門曷今愚而昨賢後
千載之嗤點莫不鍾咎於嬋娟固尤物之移人抑猶
可得而言蓋嘗觀於若人矣好大而欲速厭常而棄
舊狃會稽之得意謂周鼎其唾手闔齊楚以朶頤睨

陳蔡而驤首道甚遠而疾驅氣已餒而猶鬪外未寧
而內憂東畧之而西否阻關河以屯兵撤牆屋而致
寇亟歸視其四封蔑一夫之能守是猶螳螂之慕蟬
而不知黃雀之議其後也然而蕞爾之旅而衡行四
方攻靡堅郭戰無距行事便時利如經乎無人之鄉
惜也未聞於大道宜其逸樂而志荒次有臺池宿有
嬪嬙左攜修明右撫夷光桀二八以前列咸絕世而
浩倡嗟浣紗之彼姝乃獨繫於興亡蕩龍舟之水嬉
擷香徑之春芳載夕陽以俱還秉游燭於夜長灑金
鍾之千石做酒池於舊商歌吳歆而楚舞薦萬壽於
君王悵星河之易翻嘉來日之未央鍾銅壺之鳴悲
爛急烽之森芒慘梧宮之生愁踐桐夢之不祥歛高
陵與深谷委盛麗於蒼茫所謂玉檻銅溝朱簾椒房
理鏡之軒響屨之廊香煙蕪與露蔓紛日暮之牛羊
而況於捧心之百媚濯粉之餘粧者哉今則雲雨之
巔僊聖是宅硯沼萼溪琴臺松岬封古薛於井甃宿

暗芳於洞穴木鯨吼以清厲金磬隱其蕭瑟彼方外
之徒龜藏而蠖屈者又安知其往古與來今方枯禪
而縛律翩鴻影之拂坐見前山之銜日李白風動荷
花水殿香姑蘇臺上宴吳王西施醉舞嬌無力笑倚
東窻白玉床白居易吳王心日侈服玩盡奇瓌身卧
翠羽帳手持紅玉盃冠垂明月珠帶采通天犀行動
自矜顧數步一徘徊小人知所好懷寶四方來奸邪
得藉手從此倖門開古稱國之寶穀米與賢才今看
君王服視之如塵灰伍員諫已死浮屍去不回姑蘇
臺下草麋鹿暗生麋劉禹錫宮館貯嬌娃當時意太
誇豔傾吳國燼笑入楚王家月殿移椒壁天花代舜
華惟餘采香徑一帶繞山斜李嘉祐館娃宮中春已
歸闔閭城頭鶯已飛復見花開人又老橫塘寂寂柳
依依憶昔吳王在宮闕館娃賣眼看花發舞袖朝歡
陌上春歌聲夜怨江邊月古來人事亦猶今莫厭清
觴與綠琴獨向西山聊一笑白雲芳草自知心李紳

江雲斷續草綿連雲隔秋波草覆煙飄雪花鋪漲
渚變霜楓葉卷平田雀愁化水喧斜日鴻怨驚風叫
暮天因問館娃何所恨破吳紅臉尚開蓮皮日休六
首三千雖衣水犀珠半夜夫差國暗屠猶有八人皆
二八獨教西子占亡吳○一宮花渚漾連漪矮嬌鴉
鬢出繭眉可料坐中歌舞袖便將殘節拂降旗○幾
多雲榭倚青冥越焰燒來一片平此地最應沾眼血
至今春草不勻生○江色分明練遶臺戰帆遙隔綺
疏開波神自厭荒淫主勾踐樓船穩貼來○寶袂香
綦碎曉塵亂兵誰惜似花人伯勞應是精靈使猶向
殘陽泣暮春○豔骨已成蘭麝土宮牆依舊壓層崖
弩臺雨壞逢金鏃香徑泥銷露玉釵硯沼只留溪鳥
浴簾廊空信野花埋姑蘇麋鹿真間事須為當時一
愴懷陸龜蒙綺閣飄香下太湖亂兵侵曉上姑蘇越
王大冇堪羞處祇把西施賺得吳○鄭旦無言下玉
墀夜來飛箭滿梁愚越王定指高樓笑卻見當時金

鏤眉○半夜娃宮作戰場血腥猶雜宴時香西施不
 及燒殘蠟猶為君王泣數行○素戰雖遮未掩羞越
 兵猶怕伍員頭吳王恨魄今如此祇合西施灘上游
 ○響屨廊中金玉步采蘭山上綺羅身不知身葬今
 何處溪月彎彎欲效顰○鏤眉消落濯春雨蒼翠無
 言空斷崖草碧未能忘帝女燕輕猶自識宮釵江山
 祇有愁容在劒珮應和媿色理賴有伍員騷思少吳
 王纔免似荆懷殷堯藩吳王愛歌舞日醉嬋娟見
 日吹紅燭和煙掃翠鈿徒令勾踐霸不信子胥賢莫
 問長洲草荒涼無限年于瀆館娃宮畔顧國變生嬌
 妬勾踐膽未嘗夫差心已悞吳亡昔誰在越勝今何
 處當時二國君一種江邊墓張羽館娃宮中百花開
 西施曉上姑蘇臺霞裙翠袂當空舉身輕似展凌風
 羽遙望三江水一杯兩點微茫洞庭樹轉面凝眸未
 肯回要見君王射麋處城頭落日欲棲鴉下堦戲
 折棠梨花隔岸行人莫偷盼干將莫邪光粲粲

西施洞在靈巖山之麓

宋之問越女顏如花越王聞浣紗國微不敢寵獻作吳宮娃一

行霸勾踐再笑傾夫差一朝還舊都豔妝驚若邪羅隱家國興亡自有時越人何苦進西施西施若解亡吳國越國亡來又是誰秦約豈豈靈巖山鬱鬱松挂林石路轉陰洞覽勝竄且深如何芴羅人傾國恣荒淫山花落笑靨山鳥流好音我來重徘徊屐齒苔蘚侵至今山上月猶能照捧心高啓廢宮春盡長蒼苔不見羅裙拂地來只恐西施是僂子洞中別自有樓臺

翫花池在靈巖山

高啓挑枝魚杏枝春色繞宮池正愛紅繁處還憐綠淨時芳香泛幽汜媚

影照清漪垂條看妓折墮萼見魚吹杯涵明月瀾舟逐綵雲移水流花落盡君王醉不知

翫月池在靈巖山

硯池在靈巖山

高啓山骨誰鑿破一泓自深黥醉後欲濡毫蛇蛇見科斗陳子貞湛湛冷山骨

幽幽抱日光曉吟看雨氣春供汲花香

琴臺在靈巖山

僧半顛幾彈石土五雲深挑出湖波片月心絃外有聲誰解聽一山春樹曉鷺

吟張羽坐鼓朱絃日玉人方入吳於今山月下惟聽夜啼烏

吳王井在靈巖山有二一圓一八角猶存

羅鄴二首古宮荒井曾平

後見說耕人又鑿開拾得玉釵鐫勅字當時恩澤賜誰來○含青薜荔隨金甃碧砌磷磷生綠苔莫言數尺無波水曾與此花同照來揚備石甃遺蹤傍古臺一泓寒影鑑光開何人照面金釵落曾見越溪紅粉來高啓曾開鑑影照宮娃玉手牽絲帶露華今日空山僧自汲一瓶寒供佛前花

響屨廊在靈巖山相傳吳王建廊而虛其下今西施與

宮人步屨繞之則響故名今靈巖寺圓照塔前小斜

廊即其址亦名鳴屨廊

王禹偁廊壞空留響屨名為因西子遠廊行可憐伍相終

屍諫誰記當時曳履聲揚備步步香翻羅襪塵粉紅
花豔滿宮春傾城一笑無遺跡不見長廊響屨人高
啓廊虛應屨鳴響細識腰輕誰道吳強國唯銷舉足
傾苔間滅古跡月下歇餘聲此夕人空聽山僧曳履
行

梧桐園在吳宮吳王夫差園也樂府云梧桐秋吳王愁

高啓桐花香桐葉冷生宮園覆宮井雨滴夜風驚秋
鳳不來吳王愁周南老碧團宮園樹曾宿朝陽鳳花

開襲香霏葉密棲纖蒨雨雜璫珮聲風生金石弄初
秋一葉零深宮愁已動前園忽橫生怪入夫差夢知

匪梁棟材育
僮斯備從

採香逕在香山傍吳王種香於香山使美人泛舟於溪
以採之今自靈巖山南望一水直如矢故俗又名箭

涇

揚備館娃南面即香山畫舸爭浮日往還翠蓋風
翻紅袖影芙蓉一路照波間高啓晨妝出采芳零

露濕紅裳種徙山中品熏傳海外方抱筐歸蕙逕焚
畝薦蘭堂未足娛君寢西施體自香徐貴箭涇清谿
無縈迴西望渺何極岸直形如剡波迅勢如射飛鷗
訝流羽亂雨疑鳴鏑天狼不敢渡澤兒應當匿我志
弘矢間一覽如中的

香水溪在吳故宮中俗云西施浴處一云吳王宮人洗

粧於此故又呼為脂粉塘古詩云安得香水泉濯郎

衣上塵即此

高啓粉痕凝水春溶溶暖香流出銅溝宮月明曾照美人浴影與荷花相間紅

玉肌羞露誰能見只有鴛鴦窺半面絳紗圍掩怯新涼歸卧芙蓉池上殿空洗鉛妝不洗妖坐傾人國幾良宵驪山更有湯泉在千古愁魂一種銷周南老吳宮香水溪俗傳脂粉塘暖波浮漲膩晴渚汎紅芳美人曾此浴魂銷水猶香可憐清冷泉照此妖冶粧不濯郎衣塵孰比華清湯只今開寶林曹溪源更長

越來溪在楞伽山東南與石湖通北至橫塘相傳越侵

吳自此入故名上有越城雉堞宛然溪上有越城橋

范成大西風初入小溪帆旋織波紋縐淺藍行入開
荷無水面紅蓮沉醉白蓮酣○一川新漲熨秋光掛
起蓬窓受晚涼楊柳無窮蟬不斷好風將夢過橫塘
○飯後茶前困思生水寬風穩信篙撐不知浪打船
頭響聽作淩波解作聲高文度黃池盟會井蛙尊同
列諸侯氣已吞忽報鄰兵擣空穴已隨溪水入吳門
僧半顛九闕風月醉傾城歌笑聲中有甲兵卻是吳
王自亡國枉教溪受越來名高啓溪上山不改溪邊
臺已傾越兵來處路流水尚哀聲昨日荷花
生今朝菱葉死亡國不知誰空令怨溪水

採蓮涇在郡城東南運河之陽今尚可通舟兩岸皆民
居而間有蔬圃曠地即種蓮舊跡也上有採蓮涇橋
高啓青房戔戔多子採得儂心喜今夜水風涼君王宿
船裏行處綠雪迷歌聲一道齊回頭調越女何似若

邪溪周南老採蓮蓮有涇涇帶城西南美人掉輕橈
花深采芳潭香風飄翠舉明粧照紅酣摘鮮駢紫葯
顧影墮瑤簪藕絲長不斷君情短
何慙食甘心死苦君樂非所堪

長洲苑圖經云在縣西南七十里孟康曰以江水洲為

苑韋昭云長洲在吳縣東枚乘說吳王濞云漢修治
上林雜以離宮佳麗玩好園守禽獸不如長洲之苑

則知劉渢時嗣葺吳苑其盛如此

白居易茂苑綺羅佳麗地女湖桃李

豔陽時心奴已死容顏老後輩風流是阿誰○春入
長洲草又生鷓鴣飛起少人行草深不辨娃宮處夜
夜蘇臺空月明溫庭筠錦雉雙飛梅結子平春遠綠
窻中起吳江澹水畫簾空三尺屏風隔千里小苑有

門紅扇開天絲舞蝶共徘徊綺戶雕檻長如此韶光
歲歲如歸來徐凝吳王上國長洲苑翠黛寒江一道
斜傷見摧殘舊宮樹美人曾插九枝花許渾香徑小
船通菱歌遠故宮魚沈秋水靜鳥宿暮山空荷葉橋
邊雨蘆花海上風歸心無處託高枕畫屏中郎士元
草深那可訪地久但相傳散漫三秋雨踈蕪萬里煙
都迷采蘭處強記館娃年客有游吳者臨風思渺然
劉滄野燒空原盡荻灰吳王此地有樓臺千年事往
人何在半夜月明潮自來白鳥影從江樹沒清猿聲
入楚雲哀停車日晚薦蘋藻風靜寒塘花正開孫逖
吳王初鼎峙羽獵騁雄才輦道閭門出軍容茂苑來
山從列陣轉江自遶村回劒騎緣汀入旌門隔嶼開
合離分若電馳逐隘成雷勝地虞人守歸舟漢女陪
可憐夷漫處猶在洞庭隈山靜吟猿父城空應雉媒
戎行委喬木馬跡盡黃埃攬涕問遺老繁華安在哉
趙嘏扁舟殊不繫浩蕩路纔分范蠡湖中樹吳王苑

外雲悲心人望月獨夜雁離羣明發還驅馬闕城見
日曛高啓中國久無伯闔閭思騁功講蒐開別苑訓
武出離宮宰嚭應參乘巫臣實御戎鼙鳴深谷應置
掩廣場空遠曳捎雲旆高彎射月弓三驅儀已畢七
伐步還同甲騎從興後蛾眉侍幄中黃胎須紫豹腴
掌得玄熊僮樂事方難極英圖忽易窮城迷歌黍客地
屬采莧僮輦道崩秋雨旗門失晚風犬亡號肆狡人
去雉爭雄草樹迎蕭索湖山罷鬱葱猶疑見獵火寒
深紅燒夜

美女宮越絕書云美女宮夫差所作土城周五百九十
步勾踐嘗進美女西施鄭旦居之

吳宮在長洲苑東南五十里相傳吳王別宮南宮在吳

縣界亦吳王離宮

白居易淡紅花帳淺檀娥睡眼初開似剪波坐對珠籠閒理曲琵琶

鸚鵡語相和○一入吳王殿無人覩翠娥臺高時貯舞宮靜夜聞歌半露胃如雪斜回眼似波妍姪各有分誰敢妬恩多李商隱茂苑城如畫閨門瓦欲流還依水光殿更起月華樓侵夜驚開鏡迎冬雉獻裘從臣皆半醉天子正無愁○龍檻沈沈水殿清禁門深掩斷人聲吳王宴罷滿宮醉日暮水漂花出城儲嗣宗荒臺荆棘多忠諫事如何細草迷宮巷開花悞綺羅前溪徒自綠子夜不聞歌悵望清秋暮悠悠東去波○亂烏啞啞飛復啼城頭晨夕宮中棲吳王別殿遶江水後宮不開美人死曹鄴吳宮城闕高龍鳳遙相倚四面鏗鼓鐘中央列羅綺春風時一來蘭麝聞數里三度月明落青城醉不起江頭鐵劒鳴玉坐成荒壘適來歌舞處未知身是鬼張籍吳宮四面秋江水江清露白芙蓉死吳王醉後欲更衣座上美人嬌

不起宮中千門復萬戶君恩反覆誰能數君心與妾
既不同徒向君前作歌舞茱萸滿宮紅實垂秋風嫋
嫋生繁枝姑蘇臺上夕宴罷他人侍寢還獨歸白日
在天光在地君今那得長相棄衛萬君不見吳王宮
闕臨江起不捲珠簾見江水曉氣晴來雙闕間潮聲
夜落千門裏勾踐城中非舊春姑蘇臺下起黃塵抵
今唯有西江月曾照吳王宮裏人張祐日下苑西宮
花飄香徑紅玉釵斜白燕羅帶弄青蟲皓齒初含雪
柔枝欲斷風可憐傾國色誰信女為戎孟遲越女歌
長君且聽芙蓉花香水邊城豈知一日終非主猶自
如今有燕聲杜牧越兵驅綺羅越女唱吳歌宮盡鳥
聲少臺荒麋跡多茱萸垂曉露菡萏落秋波無遣君
王醉滿城頻翠娥○香逕遶吳宮千帆落照中鶴鳴
山苦雨魚躍水多風城帶晚莎綠池連秋蓼紅當年
國門外誰信伍員忠劉滄吳苑荒涼故國名吳山月
上照江明殘春碧樹自留影半夜子規何處聲蘆葉

長侵洲渚暗蘋花開盡水煙平經過此地千年恨荏苒東風露色清貫休夫差昏暗伯圖傾千古淒涼地不靈妖豔恩餘宮露濁忠臣心苦海山青蕭條陵隴侵寒水彷彿樓臺出杳冥此是前車况非遠六朝何處不

星星

錦帆涇即舊子城壕也世傳吳王嘗作錦帆以遊故名

在大街西貫樂橋南北市直抵報恩寺

高啓水繞荒城柳半枯錦

帆去後故宮蕪窮奢畢竟輸漁父長保秋風一幅蒲

夏駕湖在吳縣西城下吳王避暑駕遊於此故名今城

下猶存外濠有灣亦名夏駕連運河而水浸廣舊產

菱芰今多堙為民居其半在城內者為民田惟二水

匯處猶稱舊名

揚備湖面波光鑑影開綠荷紅芰遶樓臺可憐風物還依舊曾見吳王六

馬來鄭元祐吳王城西夏駕湖至今草木青扶疎想見吳王來避暑後宮濯濯千芙蕖酣紅矗翠總殊絕誰似西施天下無西施醉憑水窓睡曼衍魚龍張水戲月上湖頭王醉醒歸舟蓮炬繁春星不知左擁右扇者日夜窺吳不暫捨

女墳湖在吳縣西北吳王葬女處事具塚墓

皮曰休萬貴千奢已

寂寥可憐幽憤為誰嬌須知韓重相思骨直在芙蓉
向下銷陸龜蒙水平波澹遶回塘鶴殉人沈萬古傷
應是離魂雙不得至今沙上少鴛鴦高啓月映孤墳
近水頭芙蓉還似綺羅秋煙波千古愁難盡因帶韓

生別
淚流

百花洲在西城下胥盤二門之間

高啓吳王在時百花洲邊來

吳王去後百花落歌吹無聞洲寂寞花開花落年年
春前後看花應幾人但見技技映流水不知片片墮
行塵年年風雨荒臺畔日暮黃鸝腸欲斷豈唯世少
看花人縱來此地無花看姚廣孝詩水濫接橫塘華
多礙舟路波紅晴漾日沙白寒棲鷺綠汀魚
網集隔渚菱歌度不見昔遊人風煙自朝暮

走狗塘在城西吳王遊獵處也越絕書云闔閭走犬長

洲高啓春堤長春草淺此地吳王曾走犬獵場四面
圍畫旗紅炬照輦還宮遲割鮮夕宴誰共食臺上

西子非樊姬春苑年來草仍綠韓盧已去多麋
鹿君不見漢皇縱狗殊有功逐兔直到烏江東

干隧在吳縣西北戰國策云越王以散卒三千擒夫差
於干隧史記正義云干隧在萬安山西南一里

夷亭一名唯亭互見雜志

石射棚在石城山有石鼓鼓鳴即有兵又有石馬望如

人騎互見山

楊維禎周家十圍鼓散落陳倉野猶有
夏駕石盤盤鼓之下秦鞭血山骨吳獵

焦野火夏鼓達不拔石鳴知者寡父老懼識言山空
石長啞高啓石射棚張石城石鼓響或發石騎勢欲
行彷彿古戰場上有愁雲生餓鴟嘯寒風若箭鏑
鳴何人作此留山中鳥獸欲過膽盡驚疑是神禹治
水時來教鬼射降妖精至今風雨夕猶聽人馬聲嘗
聞父老言鼓鳴則有兵方今瘡痍民脫命見太平我

願碎其鼓墮其珊一人安
四海清自此萬年無戰爭

流栢亭在女墳湖西二百步吳地記云闔閭三月三日
泛舟遊樂之地

華池華林園南城宮石龍皆在長洲縣界闔閭故跡也

吳越春秋云華池在平昌里南城宮在長樂里

今干將鄉

吳地記云華林園在華林里

今降林

石龍在龍壇里

闔閭宮越絕書云在高平里

射臺越絕書云一在華池昌里一在安陽里又吳越春

秋云立射臺於安平里任昉述異記吳王射堂柱礎
皆是伏龜或云在橫山

林屋洞在洞庭西山即道書十大洞天之第九一名左
神幽虛之天洞有三門同會一穴一名雨洞一名暘
谷一名丙洞中有石室銀房石鐘石鼓金庭玉柱白
芝金沙龍盆魚乳泉石燕有石門名隔凡郡國志云
洞有五門東通林屋西達峨眉南接羅浮北連岱嶽
東有石樓樓下兩石扣之清越所謂神鉦吳王闔閭

使靈威丈人入洞秉燭晝夜行七十日不窮乃返曰
初入洞口甚隘偃僂而入約數里忽遇一石室高可
二丈上垂津液內有石床枕硯石几上有素書三卷
上於闔閭不識使人問於孔子孔子曰此禹石函文
也闔閭復令入經兩旬卻返云不似前也唯上聞風
浪聲又有異蟲撓人撲火石燕蝙蝠大如鳥前去不
得穴中高處照不見顛左右多人馬跡婁地記云太
湖小山名洞庭純石巉巖木唯松栢山有三穴東北

西南二穴一穴不容人有清泉流出面北一穴偃僂
纔得入穴外石盤礴穴裏如一間堂屋上高丈餘恒
津潤四壁石色青白有鵝管鍾乳南壁開處側肩得

入潛行二道北通瑯琊東武西通長沙巴陵

沈炯林屋館銘

夫玄之又玄處衆妙之極可乎不可成道行之致斯
蓋寂寥窅冥希微恍惚故非淮南八僂之圖賴卿九
井之記至若崑山平圃銀榜相輝蓬閣僂宮金臺岷
起南瞰胥臺傍連飛閣桂柱瓊軒日華雲瑞銘曰大
道既隱衆聖無門悠悠太極誰見玄根祈年立泰望
僂表漢髣髴神靈依稀宮觀峨峨林屋輪奐徘徊庭
羅花鳥室靜塵埃皮日休齋心已三日筋骨如煙輕
腰下佩金獸手中持火鈴幽塘四百里中有日月精

連亘三十六各各為玉京自非心至誠必被神物烹
惟余慕大道不能惜微生遂招放曠侶同作幽憂行
其門纔函丈初若盤礴洞洞氣黑眈眈苔髮紅鬚鬚
試足值坎窞低頭避崢嶸攀緣不知倦怪異焉敢驚
匍匐一百步稍稍策可橫忽然白蝙蝠來撲松炬明
人語散瀕洞石響高玲玎腳底龍蛇氣頭上波浪聲
有時若服匿偈仄如見繡俄再造平淡豁然逢光晶
金堂似鑄出玉座如琢成前有方丈沼凝碧融人清
雲漿湛不動瓊露涵而馨漱之恐減筭勺之必延齡
愁為三官責不敢攜一壺昔云夏后氏於此藏真經
刻之以紫琳秘之以丹瓊期之以萬祀守之以百靈
焉得彼丈人竊之不加刑石簣一以出左神俄不扁
禹書既云得吳國由是傾蘄遂纔半尺中有怪物腥
欲去既嘆惜將迴又伶俜卻遵舊時道半日出杳冥
屢泥惹石髓衣濕沾雲英玄錄乏僊骨青文無絳名
雖然入陰宮不得朝上清對彼神僊窟自厭濁俗形

卻憎造物者遣我騎文星陸龜蒙知名十洞天林屋
當第九題之為左神禮之以天后魁惟辟邪輩左右
專備守自非方瞳人不敢窺洞口惟君好竒士復嘯
忘情友致傘在風林低冠入雲竇中深劇苔井傍坎
纔藥白石角忽支頤藤根時束肘初為大幽怖漸見
微明透屹若造靈封森如達仙藪嘗聞白芝秀狀與
琅花偶又聞紫泉光甘如酌天酒何人能挹嚼餌以
代漿糗卻笑探玉符徒勞步雙斗真君不可見焚盟
空遲久眷戀玉碣文行行但迴首范成大擊水搏風
浪雪飜煙消日出見僊村舊知浮玉北堂路今到幽
墟三洞門石燕翔飛遮炬火金龍深阻護
嵌根寶鐘靈鼓何須扣庭柱宵晨已默存

明月灣在西洞庭山消夏灣之東吳王玩月處

皮日休
曉景淡

無際孤舟恣迴環試問最幽處號為明月灣半巖翡翠
巢望見不可攀抑弱下絲網藤深垂花鬢松癭忽

似狖石文或如鰐釣壇雨三處苔老星編斑沙雨幾
處霽水禽相向閑野人波濤上白屋幽深間曉培橘
我出暮作魚梁還清泉出石砌好樹臨柴闥對此老
且死不知憂與患好境無佳處好處無境刪赧然不
自適脈脈當湖山陸龜蒙昔開明月觀祇傷荒墅基
今逢明月灣不值三五時擇此二明月洞庭看最奇
連山忽中斷遠樹分毫釐周迴二十里一片澄風漪
見說秋半夜淨無雲物欺兼之星斗藏獨有神僊期
初聞鏘鏘鏘鏘鏘鏘鏘鏘鏘鏘鏘鏘鏘鏘鏘鏘鏘鏘鏘
縱舞玉煙節高歌碧霜詞清光悄不動萬象寒咿咿
此會非俗致無由得旁窺但當乘扁舟酒甕仍相隨
或徹三弄笛或成數聯詩自然瑩心骨何用神僊為
高啓木葉秋乍脫霜鴻夜猶飛扁舟弄明月遠度青
山磯明月處處有此處月偏好天闊星漢低波寒艾
荷老舟去月始出舟回月將沈莫照種種髮但照耿
耿心把酒酹水僊容我宿湖裏醉後失清輝西巖曉

猿起

消夏灣在西洞庭縹緲峰之南灣可十餘里三面皆山

繞之獨南面如門闕舊傳吳王避暑處

皮日休太湖有曲處其間

為兩涯當中數十頃別如一天池號為消夏灣此名
無所私赤日莫斜照清風多遙吹沙嶼掃粉墨松竹
調塤麓山果紅鞋鞞水苔清鬢髻木陰厚若瓦巖磴
滑如飴我來此遊息夏景方赫曦一坐盤石上肅肅
寒生肌小艇或可泛短策或可支行驚翠羽起坐見
白蓮披歛袖弄輕浪解巾敵涼颼但有水雲見更餘
沙禽知京洛往來客喝死緣奔馳此中便可老焉用
名利為陸龜蒙霞島焰難泊雲峰奇未收蕭條千里
灣獨自清如秋古岸過新雨高蘿蔭橫流遙風吹葦
葭折處鳴颼颼昔予守圭竇過於回祿囚日為蘧蔭

從分作祇稠讐願狎寒水怪不封朱轂侯豈知煙浪
涯坐可思重裘健若數尺鯉汎然雙白鷗不識號火
井孰問名焦丘我本魚鳥家盡室營扁舟遺名復避
世消夏還消憂范成大蓼磯楓渚故離宮一曲清連
九里風縱有暑光無著處青山環水水浮空高啟涼
生白芋水雲空湖上曾開避暑宮清簾疎簾人去後
漁舟占盡
柳陰風

練瀆在太湖舊傳吳王所開以練兵

皮日休吳王厭得國所玩終不足一

上姑蘇臺猶自嫌局促餘艍六宮闌櫓衝後軍肅一
陣水麝風空中蕩平淥鳥困避錦帆龍陸防鐵軸流
蘇惹煙浪羽葆飄巖谷靈境太蹂踐因茲塞林屋空
闊嫌太湖崎嶇開練瀆三尋驪石齒數里穿山腹底
淨似金膏礫碎如丹粟波殿鄭旦醉蟾閣西施宿幾
轉含煙舟一唱采雲曲不知攔楯上夜有越人鏃君

王掩面死嬪御不敢哭豔魄逐波濤荒臺養麋鹿國
破瀆亦淺代變草空綠白鳥都不知朝眠還暮浴陸
龜蒙越恃君子衆大將壓全吳吳將派天澤以練舟
師徒一鏡止千里支流忽然迂蒼奩束洪波坐似馮
夷軀戰士百萬輩浮宮三千餘平川盛丁寧絕島分
儲胥鳳押半鶴膝錦扛雜肥胡香煙與殺氣浩浩隨
風驅彈射盡高鳥杯觥醉潛魚山靈恐見鞭水府愁
為墟兵利德日削反為讐國屠至今鈎鏃殘尚與泥
沙俱照此月倍苦來茲煙亦孤丁魂尚有淚合灑青
楓枯高啓吳越水為國行師利舟戰夫差開此河餘
艤試親練十萬凌潮兒材比飲飛健鼓棹激風濤揚
舠逐雷電當時意氣盛謂已無勾踐鷗鷺避去沙洲龍
愁閉淵殿恃強非伯圖倏忽市朝變臺上失嬌姿泉
間掩慙面至今西山月恨浸秋一片猶有網魚人時
時得
沈箭

可盤灣在西洞庭山下洞庭記云吳王遊太湖從此度
軍憂艱險難達益增瞻眺曰此亦可盤桓也故名

投龍潭在龜山下林屋紀遺云嘉定初民於山下採藻
獲吳越王所投金龍玉簡簡以銀製長九寸篆文隱
然皆以朱漆填鈹題云太歲壬戌時宋建隆二年也

皮日休龜山下最深惡氣何洋溢木爆龍巢腥風
卷蛟室曉來林岑靜獮色如怒日氣湧撲炙煤波澄
掃純漆下有水君府貝闕光比櫛左右列介臣縱橫
守鱗卒月中珠母見煙際楓人出生犀不敢燒水怪
恐摧捽時有慕道者作彼投龍術端嚴持碧簡齋戒
揮紫筆兼以金蛻蛭投之光煖律琴高坐赤鯉何許

縱仙逸我願與之遊茲焉託靈質陸龜蒙名山潭洞
中自古多祕邃君將接神物聊用申祀事鎔金象牙
角尺本無不備亦既奉真官因之徇前志持來展明
誥敬以投嘉瑞鱗光煥水容日色曉山翠吾皇病秦
漢豈獨探怪異所貴風雨時民皆受其賜良田為巨
浸污澤成赤地掌職一不行精靈又何寄惟貪血肉
飽但據驪珠睡何必
費黃金年年授星使

射瀆在楓橋北十里世傳秦始皇嘗射於此故名至今
兩岸無回曲又名石瀆

蠡口在齊門北又有蠡塘在婁門東相傳范蠡乘舟出

五湖於此遣人馳書招文種

揚備霸越勲名間世才
五湖煙浪一帆開猶防

烏喙傷同輩此
地復招文種來

昇月館在帶城橋東烏鵲館在烏鵲橋江楓館在渴烏
巷吳國三古館也又二館曰通波曰全吳舊傳館凡
八全吳通波龍門臨頓烏鵲昇羽昇月昇月在宋尚
存

桃夏宮楚春申君所建

潞墅在郡西二十五里圖經云秦始皇求吳王劍白虎
蹲於丘上遂西走二十五里而失劍不能得地裂為

池因名其地曰虎嘯至吳越時諱鏐因改云許墅

角頭即角里在洞庭西山漢角里先生所居史記正義

太湖中洞庭山西南有祿里村

高啓高皇本壯士提劍定四方晚為兒女

情悲歌起彷徨愛子欲建儲寵姬方侍側顧驚四老人謂已成羽翼大臣豈不諫孰能幹天機彼翁何為者足見人心歸始潛避秦君終出安漢嗣世羅馬能羈舒卷聊自肆我來角里村如入商顏山紫芝日已老黃鵠何時還斯人神僊徒千載形不滅猶想蒼巖中白頭卧松雪

毛公壇在洞庭西山漢劉根得道處也根既成僊身生

綠毛人或見之故名今有石壇丹井在神景觀傍

皮日

休卻上南山路松竹儼如廡松根礙幽逕孱顏不能
斧擺屨跨亂雲側巾蹲怪樹三休且半日始到毛公
塢兩水合一澗衆崖卻為浦相敵百千載共搗十萬
鼓噴散日月精射破神僊府惟愁絕地脈又恐折天
柱一窺耳目眩再聽毛髮豎次到鍊丹井井幹翳宿
莽下有藥剛丹勺之百疾愈凝於白獺髓湛似捫馬
乳黃露醒齒牙碧粘甘肺膈檜異松復怪枯疎互撐
拄乾蛟一百丈骯然半天舞下有毛公壇壇方不盈
畝當時雲龍篆一片苔蘚古時時僊禽來忽忽祥煙
聚我愛周息元忽起應明主三諫卻歸來迴頭唾珪
組伊余何不幸斯人不復覩如何大開口與世爭枯
腐將山待夸娥以肉投猓獠歛坐侵桂陰不知已與
午茲地足靈境他年終結宇敢道萬石君輕於一絲
縷陸龜蒙古有韓終道授之劉先生身如碧鳳凰羽
翼披輕輕先生盛驅役臣伏甲與丁勢可倒五嶽不
惟鞭羣靈飄颻駕翔螭白日朝太清空遺古壇在稠

疊煙蘿屏遠懷步置夕列宿森然明四角鎮露獸三
層差羽嬰回眸眇七炁運足馳疎星象外真既感區
中道俄成邇來向千祀雲嶠空崢嶸石上橘花落石
根瑤草青時時白鹿下此外無人行我訪岑寂境自
言齋戒精如今君安死魂魄猶羶腥有筴皆綠字有
芝皆紫莖相將望瀛島浩蕩凌滄溟范成大松蘿滴
翠白晝陰七十二峯中最深綠毛僊翁已僊去惟有
石壇留竹塢竹陰掃壇石槎牙漢時風雨生蘚花山
中笙鶴尚遺響湖外人煙驚歲華道人眸子照秋色
邀我分山築丹室驅丁役甲莫見嬉渴欲飲泉饑餌
木張羽方壇陰竒竹儼彼毛骨秀想見黃眉公時來
濯水溜一往不可得尚問何日又高啓欲觀漢壇符
東上縹緲峰葛花墜寒露夕飲清心胃月出太湖水
鶴鳴空澗松真境久寂寥蒼苔閱靈蹤嘗聞綠毛叟
變化猶神龍世人豈得見偶許樵夫逢攀險力
易疲探玄志難從歸出白雲外空間僊觀鐘

臨頓吳王時嘗逐東夷頓軍於此設宴餉之故名今呼
臨頓里其地猶有臨頓橋

望亭在吳縣西境吳先主所御亭隋開皇九年置為驛

通唐常州刺史李襲譽改今名

庾肩吾亂後經吳御亭御亭一回望風塵

千里昏青袍異春草白馬即吳門何人鯁伊洛兵馬
亂輾轅輦道同關塞玉城似太原休明鼎尚重秉禮
國猶存殷牖爰雖闕堯城吏轉尊泣血悲東走橫戈
念北奔方馮七廟略誓雪五陵冤人事今如此天道

共誰
論

柳毅井在洞庭東山道傍按小說載毅傳書事或以謂

是嶽之洞庭然橘社因在其地至今稱社下

死亭灣在閭門外七里漢朱買臣妻既棄其夫而再嫁

後見買臣貴恥而自縊故名其處

高啓貧賤衆所棄豈惟愚婦人珪組

何重輕能令變交親翁子皆未達妻去恥負薪五十
非晚貴不能待終晨一旦謁帝閭還家繡衣新邸吏
驚赤綬邦人候朱輪無緣見故夫自
殺此水濱誰知孟德耀元在爾東鄰

金昌亭在閭門宋景平二年廢少帝為營陽王幽於吳

郡徐羨之等遣使弑帝於金昌亭王有勇力不即受
制突走出閭門追以門闕踣之此云走出閭門則亭

當在城內又陸龜蒙謂梁鴻墓在金昌亭下一里恐
今城視昔或遷徙耳

般若臺在吳縣西二里晉穆侯何準捨宅建之東北有
般若橋今呼為朱明寺橋

烏夜村在崑山縣晉穆帝何皇后父淮寓此產后之夕
有羣烏夜驚於村落自後有烏徹夜鳴必有大赦高啓

荒村烏夜棲忽繞月明啼生得東家女身為萬乘妻
至今種高樹不遣烏飛去居人几幾家愛聽啼啞啞
啼啞啞忽驚怪
婦開門向烏拜

鬱林石在婁門孫吳時鬱林太守陸績罷政歸官廩無

裝舟輕不能道海取石為重世愛其廉號鬱林石

吳寬

記石之產於吳者奇形怪狀不可盡述良工采之好事者賞之君子則藐之於此有石焉頑然數尺重而不奇蠢而不怪盡山中皆是物也良工棄之好事者藐之君子則賞之豈徒賞之又從而貴之敬之視其物殆與魯璜秦璧等非物也人也蓋當漢末吳郡陸公績仕於孫氏為鬱林太守相傳汎海歸吳舟輕恐覆取巨石為裝蓋其廉如此公家婁門之內臨頓里之北石留民家至今猶存而埋沒土中僅露其背過者猶能指而稱之曰此漢陸公鬱林石也然未有表識之者弘治丙辰有司以其古物也且特異并置察院之側作亭覆之名曰廉石石始僻而通久湮而顯觀者閑然足跡不絕惟昔南中有貪泉焉飲之者見

寶貨以兩手攫而懷之物之能移人心如此今之廉石正與此戾自茲以往凡過而視之者其廉士固欣然摩挲愛玩以益勵其操若夫貪者將俛首赧顏趨而過之有不動心而改行者尚得為人類也乎

交讓瀆在子城北今堙為民居僅有污池丈許又有交讓巷

白公堤在虎丘山塘白樂天所築

越公井在治平寺前小岡上唐廣明元年修井記云隋開皇十年越國公楊素築城穿此井其徑一丈有奇

石欄如屏繞上有刻字

高文度甃缺磚歌角已剝脫
羸鮒射不生瀾曾聞大慧無

生法甘露瓶
中滴滴寒

丹井在虞山南嶺下

宋瀛銘海虞有虞山梁天監初漢天師十二代孫張道裕來隱其下

建招真之治鑿丹井焉宋淳熙中道士李正則浚井得藏丹石緘啓之化為雙紅鵠飛入尚湖至今湖中丹光煜煜然邇年井且廢莫知其所周尊師玄真窮日力尋獲之重加以甃構亭覆上時皇明洪武元年也僊家鍊丹必以井故名山多有之其在今海虞者舊廢而新治豈玄學復興之徵歟銘曰太陰委精自天一融而為液養萬物神丹浴之赤如日有夫玄巾發我室雙禽衝霞飛珊珊靈泉重噴甘逾蜜飲焉壽與天地畢

雪井在虞山乾元宮宋申元道構庵以居山削無水一

日大雪惟山坳不積浚之得美泉因名初元道未作
庵時嘗受其師語云無雪則開後既悟而開井互見
寺觀

洗馬池在府學之南

重玄寺藥圃唐末僧元達年踰八十好種名藥凡取種
者多致自天台四明包山勾曲叢萃紛糅各可指名

皮日休嘗訪之為賦詩

皮日休雨滌煙鋤偃僂賁紺
芽紅甲兩三畦藥名卻笑桐

君少年紀翻嫌竹祖低白石靜敲蒸朮火清泉閑洗
種花泥怪來昨日休持鉢一尺彫胡似掌齊○香蔓

蒙龍覆若邪檜煙杉露濕袈裟石盆換水撈松葉竹
徑遷牀避笋芽藜杖移時挑細藥銅鉗盡日灌幽花
支公謾道憐神駿
不及今朝種一麻

石幢在郡城北數里唐徐浩書郡守陳師錫徙置府第
鄉人夜過河上者多見鬼物乃相與請於州復置舊
處其怪遂絕

睡龍灣在吳江縣東南五十里黃家溪相傳宋高宗南
渡時駐蹕於此有泉湧出因名

僊人洞在吳江東門僊里橋下深黑莫測俗傳此洞通

太湖約七十里可出林屋洞宋陳昉為僊從此去

虎丘寺古杉在殿前相傳為晉王珉所植唐末猶在形

狀甚怪不可圖畫

皮日休種日應逢晉枯來必自隋
鰐狂將立處螭鬪未開時卓犖擲

搶翰叉牙束戟枝初驚鰐篆活復訝獠狂癡勁質如
堯瘦貞容學舜黻勢能擒土伯醜可駭山祇虎爪拏
巖穩虬身脫浪歌搓頭禿似刷拚嘴利於錐突兀方
相脛鱗皺夏氏胝根應藏鬼血柯欲漏龍聚吻似神
屠怒呀如猱偷饑朽癰難可吃枯腫不堪治一炷玄
雲拔三尋黑稍奇狼頭敦宰豎蠱尾掘孽垂目燥那
逢燿心開豈中鉞任苔為疥癰從蠹作瘡痍品格齊
遼鶴年齡等寶龜將懷縮地力欲負拔山姿未倒防
風骨初僊負貳屍漆書明古本鐵室抗全師礪礪還
無極伶俚又莫持堅應敵駿骨文定寫厠皮蟠屈愁

凌刹騰驤恐攫池搶煙寒噉嶙披蔦靜裊威仰誠
難識勾芒恐不知好燒胡律看堪共達多期寡色諸
芳笑無聲衆籟疑終添八柱位未要一繩維盡日來
惟我當春翫更誰他年如入用直搆太平基陸龜蒙
衆木盡相遺孤芳獨任奇揅天形碑兀當殿勢殿危
恐是夸娥怒教臨截薛衰節穿開耳目根癭坐熊羆
世只論榮落人誰問等差有崩從日上無葉與秋欺
虎搏應難動鵬蹲不敢遲戰鋒新缺巖燒岸黑黝鰲
闕死龍骸雜爭奔鹿角差肢銷洪水腦稜聳梵天眉
磔索珊瑚湧森嚴獅多窺向空分犖指衝浪出鯨鬚
揚僕船撞在蚩尤陣燾隳下連金粟固高用鐵菱披
挺若苻堅挫浮於祖納推崢嶸驚露鶴趣越閬雲螭
傍宇將支壓撐霄欲抵毆背交蟲臂揭相向鸛拳追
格筆芝反初猶立階干卓未麾鬼神應暗畫風雨恐
潛移已覺寒松伏偏宜后土疲好邀清肅傲堪映古
茅茨林大應容蝎年深必孕孽後凋依佛氏初植必

僧彌擁腫煩莊辯搓牙費庾詞詠多靈府困搜苦化
摧卑類既區中寡朋當物外推蟠桃標日域珠草侍
僊墀真宰誠求夢春工幸可
醫若能噓嘅竹猶足動華滋

白公檜唐白樂天手植在州宅後池光亭前水中政和
初己搞瘁高不滿二丈後為朱勔取獻京師死道中
乃以他檜易之禁中不知也

七星檜在常熟致道觀梁天監中所植奇古特甚

李坦之梁

人植檜虛壇下宛若魁衡列太空方士靈旗布玄武
神居寶劍化蒼龍傍枝旋幹東西指一氣周回上下
通肯學秦朝老松樹
屈身甘受大夫封

古松在太平山獅子巖下自地崛起甚怪正中一幹聳拔如幢延袤二畝號眠松張即之書卧雲二字扁之

云范文正讀書處也

高啓龍門西岡魏公祠前有松多古技長身蜿蜒橫數畝巨

石作枕相撐撐春泥半封朽死骨凍蘚畫裂皴生皮無心昂聳上霄漢偃仰獨向荒山陞蟄雷破嶽撼不動千載一夢醒何遲正如卧龍未起日深意有待風雲期太湖月出照夜魄天峯雪積埋寒姿濤聲時吼若鼙息野老驚起山僧疑左伸右屈多異態天自出巧非人為畫師安能把筆寫樵子豈敢操斤窺杜陵枯栢已憔悴蜀相老栢非瑰奇何如此樹怪且壽呵衛定想煩靈祇不知已閱幾人代游客過盡今存誰明堂屢興不見取得全正愛同支離我嘗來觀忍遽反醉坐其上高吟詩葛陂筇竹亦騰化神物終去可

久羈何當一叱使飛起載我萬里游天池他年還訪
舊城郭正是白鶴歸來時吳寬盤盤蒸山麓側徑頻
折旋山人引我去云有長松眠石磴被蔓草攝衣步
相連果然見奇樹如神龍蜿蜒鱗甲生滿身仍怪髻
鬣全恍若出巨壑疑將赴深淵未學擾龍術卻立不
敢前天風谷口起繞視惟茫然枝幹既屈曲不中棟
與椽茲山非社櫟亦復全天年傍有短石垣制作良
且堅四堞屹不動密累皆古軌斷裂蒼蘚間有碑昔
人鐫銘文已磨滅篆書冠其顛荒山少居民始知徐
公阡摩挲發長歎助我松聲圓草棘莫剪除應乏雲
仍賢旭日照松
下同之吊重泉

姑蘇志卷三十三

欽定四庫全書

姑蘇志卷三十四

明 王鏊 撰

塚墓

周禮墓大夫掌凡邦之墓域而為之圖今制忠賢之藏則為之置守護禁樵牧亦先王遺意也獵往代采近時以著于篇

商巫咸墳在巫門東北三里巫咸商太戊時賢臣是為巫門巫咸山按越絕書虞山巫咸所出史記正義謂

巫咸塚在海虞山上子賢亦葬此離騷亦稱巫咸說者以為古人巫也

太伯墓吳越春秋云太伯葬梅里平墟史記正義引括地志云在吳縣北五十里梅里村鴻山上去太伯所居城十里吳地記又云太伯塚在吳縣上去城十里吳君仲雍墓吳地記曰在常熟縣西虞山上與言偃塚並列寰宇記曰虞山有仲雍齊女墓東是仲雍西是齊女梁昭明太子招真治碑云遠望仲雍而高墓蕭

瑟旁臨齊女而哀壘蒼茫今碑尚在而墓久廢吳地

記又曰仲雍墓在海虞山東嶺

周震賓詩虞墓東山頂岐州萬國西人皆

憐伯仲心實似夷齊海水龍無害蠻花鳥自啼寂寥
懷古意文保見遺黎傳良玉仲雍古塚已丘墟塚上
閑雲日卷舒莫薦不聞陳簋簋芟夷端合禁樵蘇杜
鵲啼血春風老狡兔穿瑩夜月孤過客無勞增悵惘
至今讓德重勾吳吳訥虞仲隨伯氏泯迹逃荆蠻至
今仲隱處猶自稱虞山遺跡邈難尋廢塚留山間鄉
邑失開陳歲遠埋荒菅予賤忝末裔有淚空滑滑誰
為禁樵牧陳辭扣天闕鄭東野鼠穿黃穴遺封百草
深死無歸國夢人識逸民心蠻樹冬逾碧江猿夜亦
吟海虞山上月梅里共沈沈周師敬賢哉虞仲氏讓
國來荆蠻斷髮文其身之死不復還孤塚鬱嵯峨屹
立山之間高風播宇宙邈矣誰能攀青山得以名萬

古求
不刊

周章墓圖經周章墓在虞山上

王僚墓在峯寧山西

吳地記云王僚葬山傍有思益寺

吳王闔廬墓在虎丘山劍池

越絕書及吳越春秋云闔廬之葬穿土為山積壤為

丘發五郡之士十萬人共治千里使象運土鑿池四
周廣六十里水深一丈五尺銅棺三重傾水銀為池
六尺黃金珍玉為鳬鴈扁諸盤郢魚腸之劍在焉葬
之三日金精上為白虎踞墳故名虎丘劉向疏云葬
十餘年越人發之吳地記曰秦皇求劍虎復蹲焉遂
走而失或云墓即虎丘寺法堂基也王禹偁詩惜哉
吳王墓秦帝常開破應笑埋金玉千年賈為禍不待
虎跡消已聞鮑車過又是驪山頭炎炎三月火范仲

淹昔見虎耽耽今為佛子巖雲寒不出寺劍淨未離
潭幽步蘿垂徑高禪雪閉庵吳都十萬戶烟无亘東
南王紂山頭古寺多陳迹故國空餘氣象雄霸業已
隨流水去闔閭墳草又西風張伯玉東客從來過虎
丘橘花渡口維扁舟闔閭宮殿不可見但對古塔寒
颼颼憶昔吳王全盛日水犀十萬橫吳鉤楚山既掘
荆平塚越嶺仍將勾踐囚豈謂西施能破國誰知麋
鹿上臺遊惟有吳王在時月夜深幽照劍池秋高啓
水銀為海接黃泉一穴曾勞萬卒穿謾說深機防盜
賊難令朽骨化神仙空山虎去秋風後廢榭烏啼夜
月邊地下應知無敵
國何須深葬劍三千

專諸墓相傳在盤門裏伍大夫廟側

申公巫臣墓郡國志云在匠門西南祥符圖經云在將

門外吳地記云在巫門外

按匠將聲之訛云匠門外者非是

孫武墓越絕書云在巫門外大塚去縣十里東漢書引

皇覽云在吳縣東門外吳地記云在平門西北二里

地名永昌

干將墓在匠門外

吳地記云匠門本名干將門門外有干將墓後訛為匠高啓干將善鑄劍

劍成終殺身吳伯亦遂亡神物豈不神始知服諸侯威武不及仁徒勞治金鐵精光動星辰莫邪應同埋

荒草千古春青蛇塚

間出猶欲恐耕人

慶忌墓在吳縣東北二十五里今云慶墳吳地記云在

齊門外

今十四都
有慶忌廟

要離墓在吳縣西四里閭門南城内吳地記曰在泰伯

廟南三百五十步

相傳在今梵門橋西城下馬婆墩
舊有砲座墓嘉定十六年提刑司

修城此地多得古塚皆莫詳其姓氏漢書注要離塚
在西伯鸞墓在北范志又云在閭門外金昌亭傍傳
記不同互見梁鴻墓楊維禎詩金昌亭下路春草沒
荒丘云是要離塚令人生古愁侏兒三尺餘不佩雙
吳鉤中包猛士膽白日照高秋惡死屠骨肉視身若
蜉蝣荆軻不了恨慶忌成身謀如何五噫客死與爾
仇同

王夫差墓在陽山

左傳云吳王乃縊越人以歸注以其
尸歸越絕書云夫差塚在猶亭西平

猷位近太湖越王令干戈人以一塚土葬之吳越春秋云夫差既伏劍越王以禮葬之秦餘杭山宰嚭亦葬其旁其義子墳十八所俱在陽山又號亞父塚

瓊姬墓夫差女也與夫差墓相近

高啓詩夢別夫差殿頭墮釵零落誰收土

昏青鏡忌曉月冷珠襦恨秋塵鹿昔來廢苑牛羊今上荒丘香魂若怨亡國莫與西施共遊徐貢館娃宮裏已堪愁沉直泉臺閨小丘月冷寶奩無復曉池空玉鴈不知秋蘿間舊屋僧來往竹下新亭客過遊不能識此為渚舟

吳女墓在閭門外

吳越春秋云閭閻女曰勝玉王與夫及女曾食蒸魚王前嘗半而與女

女怒曰王食魚辱我乃自殺閭閻痛之葬於閭門外鑿池積土文石為椁題湊為中以金闕玉栝銀尊珍

襦之寶送女乃舞白鶴於市令民隨觀使男女與鶴俱入羨門因發機掩之又取土時其地遂成湖號女墳湖又越絕書云闔廬女塚在閭門外道北下方池廣四十八步水深二丈五尺池廣六十步水深丈五寸隨出廟路以南通姑胥門并周六里寰宇記引郡國志云玉女墳在郭西山川記云夫差小女名玉墳在閭門外御覽引吳地記云

閭門外女墳者闔閭女墓

齊女墓吳越春秋云吳太子娶齊女女思齊而病將死

曰必葬我於虞山之顛以望齊國闔閭傷之如其言

葬之

周震賓詩翟芾三千里辭親遠結婚浪傳招楚些難近望齊魂蘭靡山頭土蒿萊郭北門生涯

歸一瞬標榜至今存張洪南風初勁北風微爭長諸姬復娶齊越境定須千兩送中途應拭萬行啼望鄉

不憚登臺遠埋恨惟嫌起塚低蔓草萋萋猶泣露清
誰滴向故鄉泥吳訥齊景不自強涕出女於吳迢迢
三千里百兩來姑蘇死葬虞山顛北望父母都芳魂
逐飄風艷骨歸黃壚空餘一荒丘月夜嗥饑狐程式
宗國中微日勾吳始霸時來歸非我志時事有天知
身死蘇臺下心馳淄水涸萋萋芳草墓千古不勝悲
鄭東突兀孤墳在千年恨尚新荆蠻非偶國盤瓠媿
吾人躑躅春啼血孤狸夜得鄰營丘無霸業吳沼更
傷神林大同嘗聞齊景公涕出女於吳蓋姜志貞烈
憂憤身為殂吳亦憫其生卜葬于海虞中宵走飛燐
昭明燭太虛有客從宦遊考功朝
帝都煜煜有耿光應與忠義俱

孫王墓在盤門外

晉張悅代吳令謝詢求為諸孫置守
塚人表臣聞成湯革夏而封杞武王

入殷而建宋春秋征伐則晉修虞祀燕祭齊廟夫一
國為一人興先賢為後惡廢誠仁聖所哀悼而不忍

也故三代敦繼絕之德春秋貴柔服之義昔漢高受命追存六國凡諸絕祚一時並祀親與項羽對爭存亡建羽之死臨哭其喪將以位嘗降尊力嘗均勢雖功奪其成而恩與其敗且暴興疾顛禮之若舊殘戮之尸乃以公葬若使羽位承前緒世有哲王一朝力屈全身從命則楚廟不隳有後可冀伏惟大晉應天順民武成止戈西戎有即序之人京邑開吳蜀之館興滅加乎萬國繼絕接于百世雖三五弘道商周稱仁洋洋之美未足以喻是以孫氏雖家失吳祚而族蒙晉榮子弟量才比肩取進懷金侯服佩青千里當時受恩多有過望臣聞春雨潤木自葉流根鵲鴉恤功愛子及室故天稱罔極之恩聖有綢繆之惠追惟吳鴻武烈皇帝遭漢室之弱值亂臣之強首倡義兵先衆犯難破董卓於陽人濟神器於甄井威震群狡名顯仕朝桓王才武弱冠承業招百越之士奮鷹揚之勢西赴許州將迎幼主雖元勳未終然至忠已著

夫家積義勇之基世傳扶危之業進為洵漢之臣退
為開吳之主而烝膏絕於三葉園陵殘於薪采臣竊
痛之伏見平吳之初明詔追錄先賢欲封其墓愚謂
二君並宜應書故舉勞則力輸先代論德則惠存江
南正刑則罪非晉寇從坐則異代已輕若列先賢之
數蒙詔書之恩裁加表異以寵亡靈則人望克厭誰
曰不宜二君私奴多在墓側今為平民乞差五人蠲
徭役使四時脩護頽毀掃除瑩壘求以為常國朝廬
熊孫王墓辯古漢豫州刺史孫堅妻吳夫人及其
子會稽太守策三墓並在盤門外三里即今齊昇院
東南面勢據古蛇門正與府治相向祥符圖經云孫
堅塋方俗稱為孫王墓按吳書堅死於初平二年年
三十七策死於建安五年年二十六吳氏死於建安
七年合葬堅墓黃龍元年權追尊堅為武烈皇帝廟
曰始祖墓曰高陵吳氏為武烈皇后策為長沙桓王
太元元年八月朔風拔高陵松栢石砌蹙動晉陽秋

云惠帝元康中吳令河東謝詢表為孫氏二君置守
家五人脩護掃除有詔從之其文張悅所作今載文
選陸廣微亦云盤門東北二里有吳武烈皇帝并長
沙桓王等三墓前志云宋政和六年邗民發墓其甌
側皆有萬歲永藏四篆字得金玉奇器甚多有東西
銀栝初若繁花良久化為腐土并金搔頭十數枚金
握臂二悉皆如新一瓦熏爐與近世陸墓所制略似
而箱底灰炭猶存碑石斷缺僅餘中平年三字州將
遽命掩之所得古物盡歸朱勔家洪伯弼香譜亦略
載此事即楊友夔所賦孫豫州墓者是也洪氏三庚
志云盤門外大冢紹興二年秋雨墮北牧童入其間
得銅器數種持賣於市鄉人往視北處蓋其隧道有
石刻隸書云大吳長沙桓王之墓赤烏三年凡十二
字知府沈揆亟命掩塞仍立石表其所勝歲為記表
席之謂策死距亦烏三年已四十載豈非權稱制之
久復改葬乎所得之器滕藏一小鏡其背有銘十四

字一銅小麟紙無款識以遺席之嘉熙中墓傍土中又得唐孫德琳墓志云開元十年寔于十四代祖吳武烈皇帝陵東南平地又按丹陽圖經載高陵在縣西練塘鄉吳陵港熊以傳記證之當是堅葬曲阿後遷于吳史不及詳載爾膝窆所記謂紹熙中提舉常平張體仁嘗命其屬表之題曰先賢墓徐誼屬窆考訂止從俗稱孫王墓窆蓋據陳壽說破虜葬曲阿及言策之薨其將周瑜魯肅皆赴喪獨指此為伯符之墓亦未嘗及謝詢所表不審三墳同域故論說紛紜自相抵牾悟在政和知為豫州之墓在紹熙知為長沙之墓皆不能質諸傳記以求其說地亦嘗為官窆故舊志不復詳究矣因備載始末傳諸好事仍錄古今文詞如左云梁何遜行經孫氏陵昔在零陵厭神器若無依逐兔爭先捷擣鹿競因機呼吸開伯道叱咤淹江鬣豹變紛奇略虎視肅戎威長蛇飢已漢驥馬絕淮淝交戟無內禦重門豈外扉成功舉以棄出

德愎而違水龍忽東驚青蓋乃西歸竭來以求久年
代曖微微告石疑文字荆墳失是非山鶯空曙響隴
月自秋輝銀海終無浪金鳧會不飛閨寂今如此望
望沾人衣宋劉克莊題長沙王墓霸略誰堪敵伯符
每開史冊想規模一千掃衆橫江去十七成功自古
無警蹕未迎歸大內英雄可惜死東吳君看末命尤
奇時指顧張昭為託孤餘詩文
具載郡人朱凱所輯高陵編

吳王墓有三一在蛇門外大丘去縣十五里一在匠門
外櫬溪瀆中去縣二十里一曰胥女大塚去縣四十

五里

皆見越絕書

越王史墓越絕書云巫門外冤山大塚故越王史塚也

去縣二十里又云蒸山南夏駕大塚者越王不審名塚去縣二十五里

言偃墓在虞山上史記吳世家注與仲雍墓並列

澹臺滅明墓在澹臺湖傍

或曰在吳縣西南八十里又傳張士誠築城於虎丘土中

得石刻曰澹

臺滅明之墓

莫格墓越絕書云去縣二十里虎丘之北莫格古賢避世者

衛公子墓越絕書胥女南小蜀山春申君客衛公子塚

也去縣三十五里又云土山春申君時治以為貴人
塚次去縣十六里

馮煖墓在吳縣東北二里即煖所居死葬其側至唐墓

碣猶存

互見
第宅

中大夫嚴助墓在吳江縣東南百里至今呼其地為嚴
墓

漢丞相陸烈墓在秦餘杭山又云虎丘山西北十里有
水名白坊又北十里胥屏亭東所有漢豫章都尉陸

烈墓

山陰令陸寂墓在陸烈墳東二里

潁川太守陸宏墓在平門西北三里或云在華亭縣西

北四十里

按宏績長子官會稽南部都尉其為潁川太守者曰閔乃宏八世祖耳今姑仍廬志

三老顧綜墓在婁門外塘北與朱梁墳相直

顧闕誤廟碑有云刊

石婁門德輝
不減碑今亡

黃香墓在常熟梅里鎮

乾道初梅里蘇忠翊直卜葬得古塚乃黃香墓碑刻隸書首兩

句八字中二字不可識延陵慈父葬子博羸孟光貞婦寔夫於吳碑陰乃會稽東部都尉張紘也又有薛

綜脩祠日月題刻可辯者八字子瓊孫琬位
登三事蘇氏挈歸家有光怪昇棄昆承湖中

朱梁墓在婁門東南二里

梁本名肇避和帝諱改仕為
正議大夫冀吳二郡太守郡

中朱氏多其後肇一作穆按漢
制無正議大夫冀州亦非冀郡

奉車都尉衡州刺史吳煇墓在姑蘇山北十二里胥口

東岸

煇字光修丹陽
太守景之父也

蜀郡太守張康墓俗名鳳凰墩在吳縣界或云在閭門

外康考之氏族無所見唐宰相表有漢蜀郡太守張
睦王賓云子房七世孫名睦字選公東漢蜀郡太

守始居吳鳳凰墩
宜睦之葬地邪

梁鴻墓在吳縣西四里要離墓北

鴻疾困告臬伯通勿令予持喪歸及卒伯

通求葬地以要離烈士而伯鸞清高令相近陸龜蒙云在金昌亭傍幾一里續志云今閭門南城內法會

菴西有古塚傳為要離梁鴻墓闕

有漢

高士梁君諱鴻字伯鸞扶風人君得天元統誕其生

知囊括道妙而游於世遭漢微缺澆風偃物君以為道不可徇時故安節以高蹈高蹈不可以激俗故登却以作歌歌不可以遺患故適越以遐避避不可以不粒故寄食於杵臼是以孟氏悅其道而妻之伯通尚其風而禮之安夫大而遺其細忽夫語而順乎默樂則行之憂則違之斯可謂高世之逸民矣原夫天之運也曰明與晦人之道也曰否與泰達人知否與晦之不可為也故耦而耕狂而歌繫垓以逃荷蓀以游而晦德避難不成乎名於戲伯鸞非斯人之徒則誰與哉唐大厯六年小子旅於吳得君之舊游焉孟

子稱聞柳下惠之風者鄙夫寬薄夫敦然則聞之風聲亦將舍爾采厥以觀我靈龜乎乃刊貞石以識遺烈銘曰山隱器車河秘馬圖伯鸞不行獨與道俱太虛無際浮雲無繫伯鸞伊何冥跡人世直道辱身三黜魯邦扣馬逆誅餓于首陽邈矣伯鸞靜而含光作銘皋橋萬古是望

吳郡餘杭邵氏夫人墓在吳江縣陳思村

硯格書奩云至順四年耕

夫得軌於古壙中上有文曰赤烏五年七月造又一方甕上刻曰吳郡餘杭邵氏夫人之墓

吳鬱林太守陸績墓在陽抱山吳地記云在閭門外泰

伯廟西

至元間郡人朱澤民祖母病卜地陽抱山夢偉丈夫告云勿奪吾宅吾且為夫人後既而

穿地得石刻曰鬱林太守陸績之墓別有刻云此石爛人來換石果斷矣遂掩之而卜兆其傍

侍中朱桓墓在橫山

偏將軍步騭墓在吳縣東北三里一百步有碑

左丞相陸凱墓在長洲縣西鳳凰山或云在松江郡西

北三十二里

太子中庶子陸瑋墓在崑山之顛

蔣有征北將軍墓碑已折沈遼詩月日欲

出已復西人間廢興那可知崑山陵谷久已變水滂唯有將軍碑

晉司空何充墓在崑山一里見寰宇記按史何氏

過江自充以下並葬吳西山

兵部侍郎石崇墓在吳縣西六里

高啓詩虬須欲怒珊瑚折步障圍春錦雲

熱真珠換妾勝驚鴻笑踏香塵如踏空酒闌金谷鶯
花醉家逐樓前舞裙墜財多買得東市愁羅綺散盡
餘荒丘猶令白首同歸
者坐伴遊魂楓樹下

黃門侍郎潘岳墓在石崇墳西北

東曹掾張翰墓在橫山東五里

將軍袁山松墓吳地記云在橫山二里盧志在橫山東

五里

山松築滄瀆壘樂孫靈芳為賊所
害麾下士李祥突白刃收骸歸葬

給事中江纂墓在太平山下地名上沙

宋孫起卿於其
地獲墓磚刻文

略云纂養父
諱本父通

淮南內史朱誕墓在婁門外一里

驃騎將軍顧榮墓寰宇記云在赤門外九里陸廣微記

云在吳縣東南二十里側有左威將軍張敏墳今實

在葑門東六里長洲縣黃天蕩南俗訛稱顧邑墓墓

西有祠題曰顧將軍廟或誤云上將軍

榮從子和亦葬吳湖應芳

詩白髮吳儂說姓名將軍墓近闔閭城微車入雄稱
三俊割吳知人得再生江月似留揮扇影松風猶作

鼓琴聲停舟一酌蘋花清野鶴飛
來躑躅鳴其餘詩俱見懷古錄

廬江太守闕臻墓在齊門東北二里今有關墓村

臻德
行清

高封關內侯

見吳地記

廢帝陵相傳在白茅市

按晉書廢帝爽太和六年廢為東海王咸安二年降封海西縣

公徙吳太元十一年崩與庾后合葬吳陵又侯白旌
異記云盜發白茅冢棺內大吼如雷野雉悉雌飛繞
赫然盜多
被燒死

瞿硎先生墓慶元志云在直塘市市有廣安寺浚塘得

古冢墓埭稱瞿硎先生字鵲子廣川人隱居不仕葬

于東陵武安寺重岡之原武安蓋廣安舊額今其地

尚多瞿姓晉書隱逸傳瞿硎先生者不得姓名亦不知何許人太和末居宣城文脊山中山有瞿硎因為名桓溫造之見先生被鹿裘坐石室神無忤色溫及僚佐皆莫測之乃命伏滔為之銘贊竟卒於山中

太尉陸玩墓在雞籠山子尚書令納亦葬此山

按史玩卒給兵

千人守家七十家太元中以玩有佐命勲先陪陵而葬由是特置興平伯官屬以衛墓則玩葬地當在南

京之雞

籠山

宋會稽內史張裕墓在吳縣西二十七里華山

青州刺史郁泰玄墓見蘇州冢墓記不詳所在記言泰
玄性仁恕葬日燕數千銜土今冢猶高大異他墳村
鄉歲時祭祀或謂吳縣西南有玄墓山疑即其地

雅兒墓宋湘東太守張濟女也元徽七年葬在至德鄉
今俗訛雅宜山

蕭天子墓慶元志云在常熟寶嚴寺東丁家灣之西故
老傳云蕭天子墓上有古木樵牧不敢近不知何帝
也按江陰志蕭天子墓在長信鄉有大土封號倉堆

又按梁史梁敬華為江陰王殂蕭季卿嗣陳大建二年除侍中淳于氏就季卿買梁陵中樹皆坐免即此觀之墓亦有自又盧氏云唐蕭存人號為蕭夫子嘗為常熟主簿恐葬此訛稱云爾

梁朝公主墓在乘鯉坊即傳法尼寺後大土丘也

相傳梁武

帝女出降郡人孫瑒寺其故宅也尚記之稱為妙嚴公主寺西路百步許河濱有石馬號石馬匯即其神道

門下侍郎陸雲公墓在橫山俗稱陸墓山

舊經訛為陸雲墳又或謂

陸機皆非

太常卿陸倕墓在吳縣綬山鄉

墓石從子襄為序湘東王繹為銘普通六年立

陳黃門侍郎顧野王墓在楞伽山下吳地記云在橫山

別隅平地不起墳紹興間碑石尚存

高啓詩南朝舊碑倒墓近樵蘇

道應與讀書壇
離離總秋草

唐鸞臺侍郎顏崇墓在泰伯廟西

贈尚書左丞陸象先墓在光福山西

河南法曹參軍張從師墓在虎丘

張說撰誌稱從師辯博閑達好古逸羣秀

才高第歷官五政弟從申善書有時
名子惟儉惟靜皆精左氏穀梁春秋

山南西道節度使歸融墓在城西二十餘里有大家歸

然土人號歸王墓

宋嘉熙中墓傍氏壘土得石如礎其中隆起八分書云唐故陳留言

夫人墓誌四維下殺刻瑞芝按融終於少傅無王封

陸宣公贄墓在齊門外六里

虛舟客話云在官河之西地名陸墓水名陸塘淳祐

中嘗於墓傍得遺刻與所傳合郡人周虎張震發訂其事或謂宣公卒于忠州其喪不曾還吳而忠州圖經云墓在王虛觀南三十步豪葬或云公已歸葬吳中忠州持虛冢爾

吏部尚書姚紹之墓在吳縣南五里一百步

陸龜蒙墓在甫里傍有白蓮寺

撫言龜蒙中和初卒給事頗荒誌墓吳融為祭

文千餘言有曰觸即碎潭下月拭即減玉上塵又有宋胡宿所撰碑今亡

卜將軍墓在崑山西鹿城鄉界卜山

有墓記畧曰將軍名珍字文超西河

人生偉異有大志敬宗時紀綱顛委藩鎮騷然將軍奮孤忠雄勲盛烈為世所重

閻將軍墓常熟勝法寺東

寺即元和中閻氏舍宅所置

陸元感墓在崑山

朝議郎行右拾遺蘄翰誌

陸丞相墓在常熟縣開元鄉岡下村墓左有涇曰大墓

洪村民浚涇得朱漆板古刀錢鐵牌未知丞相為誰

也

朱氏墓在穹窿山傍

墓碑云先居下邳自平始三年避地至會昌壬戌凡八百四十二年

籍于吳故有邳村之名叙過江之祖子孫官爵字多湮泐湮俗妄云漢朱買臣墓非也

魯國夫人墓怪奇志云嘉泰中齊門外採蓮里窰戶起土於古冢側得方石題云唐周軍魯國夫人墓又云長慶三年四月十四日葬於陸墓里通賢鄉之原

真娘墓在虎丘路傍圖經云在雲巖寺西南山下

吳妓人也

詳見李紳詩序雲溪友議又館閣書目有真娘墓詩一卷李紳詩并序真娘吳之妓人歌舞有名者死葬虎丘寺前吳中少年從其志也墓多花草以蔽其上嘉興縣前亦有吳妓人蘇小小墓風雨之夕或聞其上育歌吹之音其詩云一株繁艷春城盡雙樹慈門忌草生愁態自隨風燭滅愛心難逐雨花輕黛消波

月空蟾影歌息梁塵有梵聲還以錢塘蘇小小祇應
迴首是卿卿白居易真娘墓虎丘道不識真娘鏡中
面唯見真娘墓頭草霜摧桃李風折蓮真娘死時猶少
年脂膚蕩手不牢固世間尤物難留連難留連易銷歇塞
北花江南雪譚銖虎丘山下冢纍纍松柏蕭條盡可
悲何事世人唯色重真娘墓上獨留詩李商隱虎丘
山下劍池邊長遣遊人嘆逝川胃樹斷絲悲舞席出
雲清梵想歌筵柳眉空吐效顰葉榆莢還飛買笑錢
一自香魂招不得祇應江上獨嬋娟王禹偁女命在
于色士命在于才無才無色者未死如塵灰虎丘真
娘墓止是空土堆香魂與膩骨銷散如黃埃何事千
百年一名猶在哉吳越多婦人死即藏山隈無色故
無名丘冢空崔嵬唯此真娘墓客到情徘徊我是好
名士為爾傾一杯我非好色者後人無相咍楊梅水
肌玉骨有遺妍粉作嬌雲黛作烟知有香魂埋不得
月深巖底月中仙高啓金釵葬小墳楊柳寺前村已

斷花間信空歸月下魂山鶯留曲韻草露帶啼痕車
馬逢寒食還來酹酒樽顧瑛何處真娘墓雲霧斷石

根夜深風雨急

誰喚海棠魂

綽墩傳為黃縉綽墳互見山類

幽獨君墓大厯十二年虎丘寺有鬼題詩二章隱於石
壁上觀察使李道昌以聞敕令致祭後數日復隱出

詩云欲知潛寐處山北兩孤墳莫詳姓氏故稱為幽

獨君今山北有二墳猶存

互見紀異條李道昌祭文
嗚呼萬古丘陵化無再出

君是何人能言詩筆何代而亡誰人子姪曾作何官
是誰仙室寂寞夜臺悲呼白日不向紙上石中隱出

桃源三月綠草垂楊黃鶯百啭猿聲斷腸不題姓字
寧辨賢良嗚呼痛哉嘆惜先賢空得經史終無再還
青松嶺上峯我碧山大唐政集已記詩言痛復痛兮
何處賓悲復悲兮萬古墳能作詩兮動天聲哀怨兮
淚沾巾感我皇兮列清酌願當生兮事明君高啓詩
君本何代人姓名復為誰何年棄人間長眠此山陲
荆榛鬱朦朧孤墳上無碑游魂久未化哽咽還能詩
人歿乃歸滅憂樂宜復知君何獨煩冤猶有親愛思
一死眾所同已矣焉足悲
陳辭為相吊此理君當推

莊府君墓在嘉定縣城南澄江門外

誌云名秦馮翊郡人咸通三年葬于

崑山縣東一百里伍家

厓嚶城鄉橫瀝水西

吳越廣陵王錢元璩及其子中吳軍節度使文奉墓並

在橫山即踞湖山

錢氏有國日造薦福寺於山下土人遂以寺名名山又墓傍有壽聖

院晉天福五年文奉建以奉廣陵墓祀初名吳山院至宋治平中賜今名崇寧元年文奉孫公著立石少府監丞強浚明為記盧志云墓在橫山楞伽寺傍非也且以浚明所作記為明因院記而謂公著所撰亦非明因院即薦福山感慈院也凌民瞻有方丈記不及錢氏父子則非所謂墳祠矣

李墓在常熟縣東南四十五里

慶元志云相傳吳越錢王遣將梅世忠李開山

屯梅里開山卒葬於其旁十八里故曰李墓今土人或謂之李王墓梅里蓋因二將得名今誤名梅里

宋駙馬都尉石端禮與陳國靖懿帝姬墓在黃山法雲

寺堂上

見周必大游山記按哲宗女封瀛國出降改陳國長公主卒謚靖懿而常熟縣東七十二

里有靖懿帝姬殯所傍有褒親崇惠寺
政和七年賜額當時權厝後改葬耳

晉國公丁謂墓在華山習嘉原

范文正公仲淹祖墓在太平山三讓原

曾祖夢齡蘇州糧料官贈太師

徐國公祖贊時祕書監贈太師唐國公父壩武寧節度掌書記贈太師周國公天平吳巨鎮石山土穴人以爲范氏慶原今稱三太師墓子孫散祠本山者不能悉書

工部尚書李堪墓在至德鄉洞涇西

禮部侍郎蔣堂墓在橫山魯塢堯峯寺傍

至和元年葬門人邵必誌

胡宿撰
神道碑

鄭文肅公戩墓在橫山感慈塢

翰林學士葉清臣墓在橫山寶華寺傍

贈司徒富嚴墓在橫山寶華寺傍

天章閣待制沈起墓在長山鄉三顧原

起字興宗元祐中以刑部郎中

待制知杭州三年卒于蘇沈括銘

施昌言妻萬壽縣君徐氏墓在三讓鄉陸公原

歐陽脩銘

滕章敏公元發墓在陽山栗隴

蘇軾銘

同知樞密滕康墓在華山

正議大夫滕高知解州滕中知蕪湖縣滕修將仕郎滕

璫四墓並在華山

按滕氏譜高字仰之章敏公元發之父吳處厚作墓志中字元直忠

節公茂實之父崇寧五年卒蔡肇作志米芾書修字敏叔忠節公之子紹興二十七年卒璫敏叔之子寶

祐二年璫子大高分地與興教院俾奉祠

中散大夫陸綰墓在破山

綰為江淮荆浙發運使卧疾真州議仗無故動搢尋卒歸

葬山下人每夕聞訶導聲從墓門出紅燭夾道由是樵蘇無敢窺積五十餘年乃已

贈刑部侍郎陳質墓在華山子之奇等祔

質五子之奇熙寧初卒王

珪為誌之祥夢上帝召卒王安石為誌之元之光皆蚤世

屯田郎中林高并妻黃夫人墓未詳所在

按劉攽銘云林氏福清人

葬兩世於吳携諸孫居此傍無支親夫人惡衣食家教甚嚴稱賢母治平四年附葬夫墓

集賢校理林槩并妻墓尚書左丞吳國公林希墓並在

橫山寶華寺傍

祕書少監林旦墓在至德鄉博士鴈朝散郎子處祔

兩浙帳勾林濬墓在至德鄉馬鞍山弟嶼祔

濬字禹川槩之孫曾

之子嶼字公陟

贈金紫光祿大夫葉棐恭墓在貞山子膳部郎中唐稷

祔

唐稷誌壻陳瓘撰
按貞山恐即蒸山

翰林侍讀學士錢藻墓在太平山龍岡村

曾鞏
銘

藻母求

嘉郡太君丁氏墓亦在

銀青光祿大夫廣平侯程師孟墓在橫山下

蘇舜
欽銘

都官郎中龔宗元墓在南峯宣教郎明之祔

鍾離
松銘

司農寺丞郊置墓在太倉州大北門內今呼為大夫墳

舊志云郊朝散墓在郡郭樊涇北官道東已夷為民
居猶露石碣云三十朝散之墓據此則當是升卿家

贈刑部尚書朱億墓在支硎山西龍池東子光祿卿綽

女白蓮花夫人皆祔

刑部郎中贈少師朱季端墓在支硎山孫志曾孫昌祔
贈銀青光祿大夫朱良墓在支硎山弟白哥祔

中奉大夫提舉廣南市舶朱思墓在支硎山孫謙祔

樂圃先生朱長文墓在支硎山南峯西

張景脩銘
朱芾表

知如皋縣朱振墓在鹿山

直史館張沔墓在穹窿山蒼陽子直龍圖閣詵祔

張諷妻彭城縣君劉氏墓在穹窿山

諷字隱直劉氏字
德姬汝之姊熙寧

八年附皇舅
墓次收為銘

職方郎中沈衡墓在吳縣界

衡字公持蕭山人職方郎中知潤州熙寧十年卒于

蘇元豐元年
葬蘇頌銘

贈特進盧文秀太子賓客盧華龍圖閣直學士盧秉端

明殿學士盧法原四墓俱在穹窿山

法原紹興五年官川陝歿于王

事詔
歸葬

尚書右丞朱諤墓在陽山下

諤華亭人附蔡京得賜第於蘇峻擢遽卒穀葬有永

墓菴或云陽山澄照寺
乃其家所請功德院也

太子洗馬許仲容墓在郡城西

濠州錄事參軍杜沂并妻江氏墓在堯山寺北

壽昌令李璿墓在太平山妻鄭氏祔

子鼃見孝友傳

贈少師徐師閔墓在蒸山

屯田郎中方龜年墓在女墳湖西子惟深祔

太子中舍邊珣墓在蒸山

紹聖二年葬甥尚書左丞陸佃銘

龍圖閣學士徐林墓在靈巖山西

利州觀察使李立墓在法華院

孫觀銘

禮部侍郎唐輝家墓在橫山寶積寺傍凡十七世

周蓋公南

歸錄云唐致遠先隴自五代以來接續葬一山平江世家惟此最久

知潭州陳睦墓在支硎山南峯

知溫州周奕墓在陽山白龍塢

祠于繼善菴

曾孫炳文祔

贈奉議郎王仲舉墓在橫山桃花塢

正和元年卒江公望誌

從孫

浙西參議大本大本從弟大成大成子楸楸子德文

德文子孜孜曾孫國賓國賓從孫敏並祔

延康殿學士徐鑄墓未詳所在

知平江樓昇誌

都官郎中章甫墓在長山鄉仕墟村道士塢

崇寧五年
葬楊時誤

碑黃

策書

龍圖范師道墓在太平山寺西

趙抃誌

范清憲公之柔墓在長洲鄉燕巢山

通議大夫公武

公武孫天鑑祔

翰林學士范良器墓在楞伽山

朝議大夫孫載墓在高景山

大觀三年葬
鮑欽止銘

尚書戶部郎中陳彥恭墓在光福山

彥恭字子愿絳曾
孫元祐進士建炎

中卒汪

藻銘

胡嶧世墓在至德鄉金井塢

尚書周武仲墓在橫山楞伽寺傍

建炎三年
葬楊時銘

和州防禦使周忠惠公墓在虞山

和州觀察使周興裔墓在虞山北積善鄉孫汧江制機

檢察水步兵才祔

胡獻惠公元質墓在黃山

諫議大夫常同墓在聚塢

周南讀書記云同字子正卒
於海鹽其妻方務德女弟聞

婿蘇師德獄起惧禍盡鬻所有龍樞之聚塢黃氏葬於水洪時紹興二十年也按史同御史安民之子政和進士歷太常博士高宗朝史

館修撰禮部侍郎知湖州卒

管勾南京留司御史臺公事邊裕墓在蒸山子知微知

章知白知常知遠知節知存知新悉祔

王文恭公綢墓在崑山縣金童橋南

直祕閣黃策墓在長山鄉銅井山

策無疾坐卒先自策題隨緣居士之塔

祖挺父彥以下子孫多葬此

少保曾懷墓在虞山興福寺北

福建運判丘礪墓在頂山曾孫江東安撫司參議官烈

祔

刑部尚書黃由墓在鄧尉山妻胡夫人祔

直寶文閣胡堅常墓在呂山

亦名胡菴山

蘄國韓忠武王世忠墓在靈巖山西

紹興二十一年王薨時祭極優渥數

使徐仲龍葬縣令執役御題神道云中興佐命定國元勳之碑碑高十餘丈較趙堆為文萬餘言初勒文而未立龜趺留木匱嘉定間敕葬趙希憚有司磨韓碑應用後始樹此碑為樓三成覆之今碑尚存而額在百步之外鄉人以為龍陣過揭去也

樞密資政節恩公王倫墓在陽山大石塢

倫字正道使金留六年不

受偽官自縊死其子述號員絕勺飲王日冒萬死與從兄遵同北方豪俠訪得父骨於河間而歸紹熙中較葬於此

范文穆公成大墓在太平山南上沙村公營先隴時更

名仰天山

舊有覺嚴寺奉墓祀亦廢

侍御史王葆墓在崑山縣東南新漕里

殷奎詩御史春秋學脫略專門

陋見諸行事間大用亦未究氣且沮權相憂深曠儲副復墓匪為眩所思在耆舊豪華育宋建皇極汴京鬱嵯峨仁化決遐邇通林林英傑多崑山雖僻左士風粹而和明經擢高第踵接肩相摩御史鄉先生學街

正不頗五傳究始終備論計外訛粵在宣和間褒然
中魏科初主麗水簿言事何委他說書輔春坊執法
居諫坡從容答時相直氣凌太阿范公在館下詰責
如切磋卒為廊廟器詞源若江河高第係隨程入室
非操戈宋史書列傳耿耿名不磨世變陵谷遷百年
無幾何城南新漕里荆榛埋銅駝景行世仰止高風
激頽波門牆自有限樵牧安敢過再拜重興
感臨風動悲歌荒苔封斷碣太息為摩挲

侍御史李衡墓在崑山縣東南圓明村

元殷奎有墓田
記殷奎詩李公

讀論語探道悟淵微政推守令最名重諫諍司生平
信跌蕩之死氣不衰表樹限樵牧善政故在茲表華
散步城南門始得圓明里冢上木已推泉下者誰氏
披榛踏青草羨門半鯉豕勛閭表阡石云是侍御史
力行敦古學名衡其姓李世家本吳都娶婦居婁溪
射策明光殿看花長安市出宰施善教矧宜猛政理

至今松陵月清光照江水拜命登霜臺白簡冠獬豸
上言論奸佞手將逆鱗批勢障狂瀾回屹立中流砥
五賢一不肖賦詠光傳記掛冠歸樂菴著述惜寸晷
顧學遠易經集傳發微旨豈唯淑後進千古垂範軌
九原不可作清淚河凝凝鄉里衆富兒厚葬崇奢侈
黃腸題湊密券臺文繡被可憐土未乾荒烟橫斷址
後世仰高躅庶激俗靡靡
復墓限樵木何異子朱子

陳墓在崑山縣五保湖中當錦溪之口有墩

相傳宋嘉泰中孝宗

妃陳氏葬此故名有蓮池
院在墓次命僧守祀今廢

司農少卿高溶墓在陽山

和州防禦使趙伯驩墓在至德鄉觀音山

周必大誌

浙西總管團練使開趙墓在管山

續會要淳熙三年開趙奏歸正人在東南

無產業其間貧者身故無地埋葬已買到平江府閭門外山地三百畝作義墳許葬忠義死事人任便選葬詔從之及趙卒遂葬於此互見宦蹟條本傳

贈太師謚正惠趙希懌墓在穹窿山

嘉定間以景獻思例出葬墓傍有瑞

芝菴理宗御題三大字

贈檢校少保忠勇李寶墓在橫山

劉過墓在崑山縣馬鞍山

嘉定五年令潘文友簿趙希懌葬之陳極誌呂大中表元

至正間
維禎又闕

為表并祠于東齋僧舍復舊祭楊以文本朝沈愚纂其事為懷賢錄

魏文靖公了翁墓在高景山金盆塢

嘉熙元年葬直寶章閣史繩祖撰神

道碑

子承奉郎嘉惠孫元南陵縣主簿華發曾孫起福

州錄事英吉安路儒學教授賢及諸孫悉祔葬山塢

參知政事高定子墓在包山

有祠賜名昭先顯慶禪院即今包山寺

知錢塘縣葛璫墓在至德鄉洞涇鳳凰原初文康公勝

仲子立章由青陽來徙葬焉立章子成忠郎珣承節

郎璫及璫子宣教郎汝諧悉祔

贈宣義郎丘琚曾孫知臨江軍基墓並在盤門外基子

連水丞稼子將仕郎洙祔

奉議郎鄭時發墓兵部尚書鄭起潛墓並在陽山西理

宗書錦峯二字以表其地

起潛刻石撰記有云其石有文厥土五色

迪功郎金章墓在姚城村

寶慶元年築名鄴山迄今子孫皆祔又有金墩相近

度支金部郎中魏近思墓在蒸山

近思文靖公子封蒲江縣男

祕書省正字周南墓在穹窿山職塢

賜廉靖處士滕宥墓在華山

護國惠忠侯楊滋墓在嘉定外垵西

朝議大夫孫載墓在嘉定合浦門外護國寺後

知榮州虞夷簡并妻恭人鄧氏二墓在蒸山子知岳州

旌及妻令人魏氏祔自後數世從葬教諭堪皆在焉

知連州虞珪墓在遮山

珪字成夫夷簡長子孫集顯于元追封珪雍郡侯集有謁墓詩

序云先君太史棄諸孤之四年集來吳門省連州府君之墓始見叔父南山翁翁與集同出太師雍國公蓋四從矣翁曰後會未可期幸留數語識歲月翁方客授外鄉人又以推人生年月日論禍福以助道故不能久留城中敢用賦此以承命云耳詩云玉屏古栢與天齊使過于今又七期各道遺書勾發上西風江水鬢絲絲○玉遮墓下有諸孫東望滄波每斷魂泣血三年餘喘在更將良淚灑荒園○族人散處江

南郡不識音容但記名世澤須
令孫子憶故家今幾尚簪纓

大理少卿湯璫墓在萬安山子仁和知縣誼伯孫宣教
郎夢夔祔

制置印應雷墓在虞山南尚湖濱

侍郎應飛墓在虞山北興福寺左

周孝子容墓在虞山北麓報慈里

父伯十點檢
母朱氏亦在

宗室某王墓在常熟塗松西半里許傳呼為南渡趙王
墳不知何王也

處士章康墓在武丘鄉

真州司法參軍朱夢炎墓在彭華鄉福星涇

運幹湯暉老墓在虎丘西謝巷

平江府通判高晞遠墓在齊門外

浙西安撫魏克愚墓在陽山栗隴子軍器監丞華國大

理司直華遠淮西機宜文字華敷祔

鄭虎臣墓在陽山西白龍祠南

虎臣字景召

衛文節公涇墓在崑山縣石浦鎮

元王清獻公都中墓在金井塢

歐陽玄撰
神道碑

禮部尚書干文傳墓在閭門西雁蕩村

歐陽玄撰封二代
碑黃潛撰碑陰記

葛應雷墓在鴈蕩村子乾孫村

李環撰
乾孫誌

俞石澗先生琰墓在盤門外尹山鄉孫王墓之東南

征東行省儒學提舉朱澤民墓在陽抱山

周伯琦誌

祖母夫

人母吉宜人二墓在焉

其地即讓陸績而
改卜者互見績墓

處士王鑒墓在靈巖鄉橫山

至正二十六年有司
買山營葬陳墓誌

儒士邵光祖耿烜姚辨三墓在鄧尉山

光祖字弘道饒
州人烜字叔昭

辨字叔雅郡人皆篤學無嗣先後死無所歸郡士徐達左收葬先祖銘王行作燧銘周南老作

平江路總管祝碧山墓在敕山子孫皆祔六世孫山西

右參政顥墓在橫山丹霞塢子孫亦祔

楊椿墓在虎丘山西華里

儒學提舉鄭元祐墓在橫山

處士陳謙墓在天平山

陳基誌

陳明善墓在雅宜山大墩

周伯琦題墓

顧仲瑛墓在崑山縣界溪

仲瑛卒於鳳陽返葬於此趙宜訥誌

張士誠母偽太妃墓在盤門外今人稱為娘娘墳又有

朱平章李司徒二墳皆士誠偽官朱名英墳在薦福

山脩竹塢李名行素

伯昇父也

墳在楞伽山下

七姬墓在郡城東北隅潘氏後圃

張羽作權厓志七姬皆良家子事江浙行

省左丞榮陽潘公皆為剛室性皆柔慧姿容皆端麗
脩潔善女紅剪製衣繡經手皆精巧絕淪事其主及
夫人皆能以禮其群居和而有序皆不為怙寵恃美
之行公每聞閭閻婦女能以節槩自立者歸必為
語其事皆應曰彼亦人為耳公笑曰若果能邪及外
難興敵抵城公日臨戰一旦歸召七姬謂曰我受國
重寄義不顧家脫有不宥誠若等當自引決毋為人
恥也一姬跪而前曰主君遇妾厚妾終無二心請及

君時死以報母令君疑也遂趨入室以其帨自經死於戶六人者亦皆相繼經死公聞之曰何若遽死邪實至正丁未七月五日也以世難弗克葬乃斂其屍焚之復以其遺骸瘞於後圃合為一家公還啓其封且泣曰是非若所安也行營高敞地而遷焉時以日薄故未暇為志及踰月始狀其事屬羽將勒石追瘞於家側嘗觀古之史氏所載貞妃烈婦能識節義決死生而不顧者恒曠世而一見今乃於一家一日而得七人焉吁不奇矣哉乃列其姓氏於石而系之以銘程氏蜀郡人年卅生女一人主奴翟氏廣陵人年廿三徐氏黃岡人年二十生女一人不惜羅氏濠州人年廿三卞氏海陵人年與羅氏同彭氏與卞氏同邵其年與徐氏同段氏大寧人年十八其先死者也公名元紹字仲昭實宋魏王廷美之裔其先以避禍易今姓未復云銘曰生也同其天死也同其時而瘞又同其封壤樹蕭條匪子之宮尚卜高原以永無窮

國朝起居注陳桎墓在陽山東之瓜山

韓復陽墓在支硎山碧琳泉下子隱士公望太醫院

使公達院判公茂並祔

復陽志金華胡翰撰新安詹希元書

翰林院待詔李榦墓在黃山

貞臣依郡人盛景華既卒景華葬于其家墓傍

互見游寓

條榦傳

兗州知州盧熊墓在武丘鄉

都昌縣知縣俞貞木墓在楞伽山寺下村中

王文靖公璫弟翰林侍講璫墓皆在陽山鳳凰峯下

濟南府經歷陳汝言墓在橫山茶塢子翰林院檢討

繼祔

楊文貞公士
奇撰繼墓碑

戶部左侍郎莫禮墓在綺川

禮部尚書楊翥墓在吳山嶺西洋灣長旗嶺下

禮部侍郎金問墓在橫山

南京右副都御史諡文恪吳訥墓在常熟縣報慈里

翰林院修撰張洪墓在常熟縣西十二里東湖村

贈工部尚書王永和墓在鄧尉山

太常少卿夏杲墓在崑山縣

陳僖敏公鑑墓在吳山西麓朝廷遣官營葬從子四

川僉事俱祔

武功伯徐育
貞撰隸墓碣

翰林院修撰施槃墓在洞庭東山黃岡金塔下

楊文
定公

志

兵部侍郎李蕢墓在陳公鄉朝廷遣官營葬

刑部員外郎程式墓在常熟縣報慈里

正統己巳鹿
從北狩殛衣

冠葬此朝廷
遣官營治

贈禮部侍郎諡文恭劉鉉墓在虎丘南袁公巷

刑部尚書俞士悅墓在白蓮橋內陳菴西先葬其妻

夫人黃氏朝廷遣官營葬

福建按察司僉事陳祚墓在吳山桃花塢子教授寧

孫知縣悅祔

禮部儀制司主事楊循吉記弘治二年三月故福建僉事鄉先生陳公之墓成

公之孫太學生悅來言於循吉曰先公墓在吳山下先君子仕歸而貧猶吾先公也以是力不得葺先公雖爵列大夫殆與庶人家等悅一士人又何能為賴天子即位下詔賜脩名臣之墓考諸國志先公名在焉宜得預詔賜悅則以白諸巡撫王公郡守賀公通守應公皆惟上德意是宣為之欣然行之而後先公

之墓始備於禮且按故復子孫一人守焉悅竊惟明
天子惠賁之恩巡撫諸公經畫之力不可以忘敢琢
石以俟記循吉既受請迺言曰嗚呼公固吳中之偉
人也夫士所急者氣節而已苟其得之則雖匹夫之
賤亦足以尊國家衛社稷而況於公卿大夫乎故士
無氣節則必為貪位為畏死為顧家未有不至於壞
事者也故夫人材者氣節先焉而才能次之然古之
君子其於患難之際苟可以直其道者必勇趨之而
未嘗有一日苟且自恕之心故天下恃焉而後世則
否每每以持重為事而新建之士恒有所待於他日
而不知官高位大則益有所不敢為也是以忠厚博
大之風有餘而嚴毅負荷之氣不足可以應安閒而
不可以待倉遽此求治者之所宜深思也然則如陳
公者豈易得哉方公之立朝也官不過御史耳然其
危言正色殆卓然有身任民社之心固循吉所謂一
時之偉人也是其生可以重當時而其歿可以師後世

者也使有一墓而不得葺則宜吾鄉人之心哉今巡撫諸公仰惟明天子重德尊賢之意奉行惟謹如此可謂深得明詔之旨而大有慰於吳人之望者也然循吉竊以為與公同時之人豈無有官高位大於公者而公獨得登國志位賢祠預詔恩以是仰知朝廷待君子之厚雖其遠而未嘗忘也為之臣者可不勉乎敢書於石以公為勸焉

武功伯徐有貞墓在貞山

山西右參政祝顥祭墓表
惟公天賦絕倫學精群籍

才高當世志方古人蚤發迹於賢科即致身於翰苑論思啓沃足潤皇猷保障綏寧克清時患爰總紀綱之重懋成疏導之功而乃明炳幾先密圖匡復遂乘風雲之會親依日月之光寅亮天工變調元化毅然以堯舜君民自任謂太平指日可期夫何納牖乍通穿墉遽入以是魚水方諧而萋斐交布河山雖誓而

阱陷肆張卒至敬興安忠州之行純仁甘永州之去
平平王道蹶驥足於疾驅浩浩長風推鴻毛於奮舉
巷伯之章徒誅緇衣之義誰陳而彼且操戈於入室
之後投石於下井之餘擁撫蔓延釀惡未已幸賴皇
天顯佑聖主含弘履險如夷完壁往返是雖群慝之無良
亦公矯枉之大峻也夫天地之道浸淫滋潤斯成化功
暴雨疾風無資長育故決防之水必至潰隄高張之
絃多致絕響所以功赫者難成而易墮時驟者易失
而難久嗚呼惜哉

葉文莊公盛墓在崑山縣朝廷遣官營葬

都察院右都御史韓雍墓在雅宜山奇禾嶺朝廷遣
官營葬

兵部左侍郎孔鏞墓在橫山丹霞塢朝廷遣官營葬
工部尚書程宗墓在常熟邵家灣

南京工部侍郎徐恪墓在常熟縣北門外朝廷遣官
營葬

太常寺少卿陸鉞墓在太倉大西門外朝廷遣官營
葬

太常寺少卿馬紹榮墓在吳縣楞伽山朝廷遣官營葬
封詹事府少詹事王朝用墓在洞庭東山朝廷因其

子鑿貴遣官營葬

神道碑維王氏世居吳之太湖東洞庭山曾祖諱廷寶祖諱伯莫考

諱惟道皆有隱德公諱琬字朝用後以字行以其子鑿貴累封中憲大夫詹事府少詹事兼翰林院侍讀學士弘治癸亥二月初九日卒訃聞上以濟之講筵侍從之勩推卹有加既命有司營葬域復遣官諭祭于家蓋異數也公少時質甚魯其學甚力初為邑庠弟子員屢應鄉試不偶進太學卒業復不偶成化癸巳以監資授官知襄陽之光化縣荆襄居湖南之奧土曠山深四方流聚所在以千萬計于時劇賊劉千斤者作亂朝廷命將出師剿平之而流民散居山澤尚多執事者慮復生變議盡驅出境至繫其弩火其居公在光化獨事招徠與上官忤既而朝廷遣都御史原公傑來撫安公乃肩輿入山諭以威德編為里社緩其賦役民遂帖然無異土著又選其俊秀為弟子員時躬臨考校以示勸懲募壯勇為民兵偶習射

用銀錢為的中輒與之民益翕然思奮而上官主驅逐之議者滋不悅顧以為迂又兵革之後公私亦立疲憊未甦中貴人銜使命往來大和山者徵求需索殆無虛日公曰剥窮民媚嬖幸以圖苟容吾不忍為也遂棄官歸時歲在戊戌於是濟之已及第入翰林編修者三年矣時年已亥拜勅命進階文林郎弘治甲寅進封奉直大夫右春坊右諭德已未又進今封公自歸吳別築室於城西因號靜樂居士晚益高簡寡出歲時鄉飲郡大夫請為賓亦不赴優游泉石怡然自得公素羸中年後漸充壽幾耄耄步履飲啗如少壯一日體中小不佳盥櫛更衣寢至夜半而逝享年八十有五娶葉氏累贈恭人有賢行先公二十有六年卒子男四人長曰銘次即鰲今為吏部右侍郎文行器業雅負時望次曰銓府學生亦有文名屢試未偶次曰鈔女三人皆適名族孫男八女四曾孫男二女一初恭人卒卜葬山之西馬塢既而公命遷葬

蔣塢先塋之次至是諸子奉柩合葬焉葬之日甲子
歲十二月二十三日公存心仁厚篤於為民仕竟不
達未究所蘊濟之克成其志駸駸顯庸所至蓋未可
量昔宋王晉公直道不偶而其子魏公以相紫顯三
槐世澤累世不泯君子以為仁者有後之驗公豈其
後也邪王氏之多賢也遷與濟之為同年以道誼相
友善者三十年于茲聞公行事頗詳茲濟之以公神
道碑見屬遂不辭而為之銘曰東南百川匯為其區
洞庭中峙旁奠三吳岫崧崧瀚瀚虛涵靈孕孰鍾其美
三槐之胄百三肇立發祥濬源千七萬八派衍支分
星羅環居其盛者季秉善不渝厚積累世公生岐嶷
少成若愚憤排滓礪為君子儒牛刀小試光化劇邑
瘡痍呻吟撫摩安輯惟民生厚惟土是安胡繁而驅
而迫之還矧茲疲憊公私赤立使輶幢幢征需日急
銛肌吸髓予何寧忍亟脫吾責勿貽伊哂吳城西偏
洵靜且樂育子成志皇三錫爵溪流澄澈可以濯纓

丘壑逶迤杖履經行雙鑠是翁充養有道簡然長往
亦既大耄勅營塢域蔣塢之涯宰木欣欣婉美庭槐
賜進士及第榮祿大夫太子太保禮部尚書兼武
英殿大學士知制誥國史經筵官餘姚謝遷撰

禮部尚書謚文定吳寬墓在薦福山西其父贈吏部

右侍郎孟融母淑人張氏繼母王氏墓皆在其左文

定公母王氏卒朝廷遣官營葬

墓誌銘公姓吳氏諱寬字原博學者稱爲

鉅菴先生蘇之長洲人祖諱壽宗贈嘉議大夫吏部
右侍郎考諱孟融累贈亦如之公在成化弘治間爲
翰林院修撰遷右春坊右諭德左春坊左庶子兼侍
讀進詹事府少詹事兼侍讀學士出爲吏部右侍郎
轉左侍郎兼學士入內閣典誥敕掌詹事府事終禮
部尚書兼職如故生宣德乙卯十二月丙寅卒於弘

治甲子七月戊戌壽七十配陳氏累贈淑人貳室陳氏生二子爽與以明年乙丑十一月丙申葬於吳縣

花園山關

之原公蚤學晚達雖有奇遇殊寵而弗

究於用天下有遺望焉嗚呼慟哉蓋公年十二而為府學生十八而應試三十四而舉于鄉三十八而登進士在官三十三年其得科第也始試又不售已絕意進取提學陳御史士賢見其文奇之敦勸就試為京闈書魁試禮部名第一殿試之日魁選未定憲廟已出御便殿趣讀卷眾亟擬以省元卷上既賜及第時論翕然其校士則辛丑甲辰為同考丁未壬戌為主考皆在禮部得人為多而壬戌所取為庶吉者即奉詔授之紫讀卷例用尚書己未之試公獨以侍郎預其講讀侍從則今上在東宮時為講讀官御極即敕充經筵講官最後乃直日講而令皇太子講讀又以宮僚長日預侍焉其史事則修憲廟實錄兼校正修大明會典充副總裁比修歷代通鑑纂要亦如之

凡此皆翰林職任自部曹復入領者前所鮮見其居喪則在修撰時以父病乞歸省事不應例特予告遂終制及以侍郎丁繼母憂六載闕吏部仍擬公名服未闋數月朝廷為虛位待之尤仕途所未有其寵遇之典則以三品賜鶴袍犀帶詔旨稱卿春秋丁遣祭先師孔子御殿傳制皆用內閣禮以疾告則命醫診視遣中官存問賜酒肉蔬米諸物訃聞則命有司治葬如例而加祭二壇賜鏤楮萬緡為賻驛給舟車遣官護送超贈太子太保皆出常格若賜謚文定則本朝自南陽公之外一人而已其長子爽以三品恩已蔭為國子生比以舊學恩當官其少子爽特命爽為中書舍人而以爽補國學蓋上欲大用公而年已不逮故其既歿尤為之眷注周悉如此云公識趣高雅行履端潔孝友天至遇族里有恩其居官廉慎律物以權勢所在未嘗寧處既復就清簡雖優詔累留而引退不置惟於學充然自得所為文醇古有法詩得

唐格書酷似蘇體詞命在朝廷紀載在史局碑板翰墨遍于天下執此亦可以不朽矣爽奉禮部左侍郎李公世賢狀請余銘乃哭而為之銘銘曰維世有望間不容僞上有廷論下則興議遠且賤者與臺奴隸彼憐無知孰強而係其所自致匪爵齒位別其燕之功詎云易官居六卿孰謂非貴年登七旬壽亦云至惟三不朽公有其二有德有言功則未既其所未既尚有餘思我銘吳公以俟來世榮祿大夫太子太保禮部尚書兼謹身殿大學士知制誥經筵國史官會典總裁長沙李東陽撰

贈都察院右副都御史徐諒墓在吳縣堯峰山以子源貴累贈今職吳文定公撰表

姑蘇志卷三十四